



痘疹世醫心法卷之五

成實證治歌括 凡三十四首

痘瘡成實作膿窠 只要膿成飽滿多

根脚紅鮮色蒼蠟 刻期收靨保元和

痘瘡初出一點血只成小小血疱起發則漸長大血
化成水為水疱至水疱轉作膿疱始成實矣成實之
時却要箇箇成膿肥澤飽滿根脚紅活又蒼蠟色如
此者可以刻定日數而知收靨之期

陷起平尖根脚紅 窠囊血水盡成膿

自然表裏無邪毒

莫使湯丸又妄攻

陷者起平者尖水成膿紅活者不須妄服藥

痘瘡初出或中心陷下者或頂平者或根窠白色者其人能食或治不乖方以致起發之後陷者盡起平者復尖白淡者變紅活窠中血水已化為膿夫陷起平尖起發可謂透矣紅活飽滿氣血可謂足矣水化為膿毒亦解矣表無痒痛之症裏無吐瀉之症是表裏又無病矣如此者坐待收靨不可妄投湯劑

一面起發如初出

一面成膿有後先

發已透時膿又熟

毒隨膿化病除根

痘之上者

痘子輕者常作三四次出有大小有先後起發亦作三四次先出者先起後出者後起大者自大者自小亦如初出之樣待至養漿則先長者先作漿後長者後作漿大小亦如之磊落分明不相粘連者上也痘子密者長大胖壯以至作漿未有不相串者只要陷者盡起無處不透轉成膿漿次也膿成之後毒氣以解無復畱伏矣

痘之次者

痘熟渾如果熟形

外無嬌色內多津

膿漿飽滿迴蒼蠟

可許如期結靨成

順痘論

凡痘瘡發熱三日出現三日起發三日養膿三日結
靨三日共三五一十五日乃大率常數也惟痘密毒
甚者常過其期痘疎毒微者常不及期雖不可以日
期計猶當以常數為定則也初出現時其形小其色
紅乃是一點血至起發其形圓其色紅白乃血化為
水也養膿則其形大而堅其色紅而黃乃水化為膿
也結靨則其形大而軟其色紅而黑謂之蒼蠟此膿
熟欲靨之狀如果之熟自然外皮軟而內肉爛也假
如十日以後正當成膿結靨之時其形平陷其色紅

生痘血至
氣不至倒
陷也

紫外不胖壯內無膿水此名生痘血至而氣不至乃
倒陷也不出十三內腹脹氣喘悶亂而死

李廷讓吾次男那孝妻弟也一子四歲辛未春出
痘至十日後予往視之見其痘頂平陷根窠紅紫
昏睡不食予曰不可救也次日死

起發圓圓不作膿 一身匡郭總成空
如斯空痘真凶險 若不傷殘也發癰

順痘

痘瘡起發小者漸大平者漸高陷者漸起外帶紅色
內涵清水以至養膿則皆胖壯紅潤膿漿飽滿此順

險痘

逆痘

空殼血不至也

作膿時猶是空殼此氣行血不至主治

痘也。若形色灰白，膿水清淡者，險痘也。雖不傷殘，亦發癰毒，外若虛脹，內無水漿，此名空痘。氣至而血不至，亦倒陷之類，乃逆痘也。不出十三日，必痒癩而死。

待到成漿却要漿

切防清水及空囊

囊空無水邪猶伏

清水非漿痒莫當

凡痘瘡出欲盡發欲透，至於養膿便要成膿。飽滿者膿已成也，渾濁者膿之形也，黃白者膿之色也。若當作膿之時，猶是空殼，此氣載毒行血不附氣，毒者血也。血既不至，則毒猶伏於血中而不出，四物湯十九

水清淡不
作膿氣血
俱虛主治

空殼膿不飽必發癰之驗

合紫草飲六十三加蟬殼主之。如已成水，清淡灰白，

不能作膿，此氣血俱虛。所有之水，乃初時一點血氣，

解而為水，非自內潮起之水。十全大補湯主之。三十

八此二證者，為痒癩為癰，不可不知也。

舊縣張月山之妹，出痘起發，只是空殼。請予視之，

予曰：此氣有餘，血不足，證也。責在肝經，用四物湯，

合小柴胡湯服之。雖作膿，亦未飽滿。而收，予曰：凡

痘瘡不成膿，或膿少者，皆發癰毒。此足厥陰病，必

發頂疽果然。

痘瘡只說待膿成、誰曉成膿未足憑、

飽滿堅牢誠可喜、濕淫軟薄又堪驚、

成膿吉兆

人言痘疹只到成膿則毒氣化解便稱無患不知膿亦有凶有吉如瘡皮堅厚膿漿渾濁約束完固無少破損此真吉兆若瘡皮軟薄膿水清淡滲漏淫濕易於破損此猶凶也惟瘡久熟時日已過當屬不屬者則膿復化為水皮亦易破勿依此論

成膿凶兆

正作膿時不作膿、此與黑陷理相同、但將四證分虛實、那得多方指贖贖、

不作膿有此四端主治

痘瘡起發之後正待作膿却不作膿者此與不起發

而黑陷者分四證同論如感風寒則宜溫散桂枝葛

根湯五加黃芪白芷防風毒氣盛則宜托裏解毒利

小便紫草飲子一百一十七連翹湯八十相間服之大

便秘者宜宣風散九十二內虛宜溫裏十全大補湯

三十八陳氏木香散二十五觸犯宜薰解內服紫草

飲六十三外用茵陳薰法八十若煩躁昏悶者龍腦

膏一百五

膿漿方作謹看承、勿比初時一例論、

毒氣從今將解散

病人到此減精神

痘瘡起發之初已當避風寒遠人物節飲食守禁戒也到此養漿之時比之起發尤加謹焉可也蓋前此人病未久氣血猶強足以禦乖戾之變至此則氣耗血虧精神減損少有乖戾不能任之况瘡始成就尤易觸犯不可不加謹矣如天大熱則撤去衣被令常清涼但謹門窗帷帳勿使邪風透入天大寒則添厚蓋覆令常溫煖更用親人左右夾之房室中可明亮勿絕燈火常燒辟穢香九十三加乳香令香氣襲人

日夜常用一人看視互相更代勿令疲倦恐或作癢為之撫摩莫使誤破以致灌爛結痂不美

遍身瘡痘欲成漿

只要其人脾胃強

食少便堅中氣足

便清能食却無傷

痘瘡已長膿漿欲成之時專以脾胃為主脾胃強則氣血充實自然膿漿易成飽滿堅厚不須服藥脾胃弱則氣血衰少不能周灌於身使之作漿虛軟清淡雖有漿亦水而已宜十全大補湯三十去地黃加木香或人參白朮散二十去葛根加黃耆官桂多服乃

膿清淡主治

食少大便
堅者

泄瀉主治

佳然脾胃強弱於食多少大便堅利求之食少大便

堅者脾胃之氣猶足也若泄瀉則脾胃益虛四君子

湯二十送下豆蔻丸四十利止復以人參白朮散二

十三去葛根加黃耆官桂服之便清要能食不能食

者亦依上法如能食大便堅數日未更衣者用膽導

法五十一通之使氣得踈通榮衛和暢不致斑爛也

先時泄瀉總非佳到此非佳尤可嗟

津液已衰脾胃弱豈堪泄利又來加

痘瘡出形起發並不宜泄瀉恐裏氣虛毒邪不出反

成漿之時
不宜泄瀉

泄瀉主治

成陷伏故以泄利非佳兆也若成漿之時尤不宜泄

比之於前殆有甚焉蓋前此為病未久脾胃尚強足

以任之今則病久津液已衰脾胃已弱若復泄瀉則

僅存之氣重竭於內方張之毒不能成於外或為痒

癩或為倒靨或寒戰咬牙虛憊而死輕則人參白朮

散二十三去葛根加木香官桂黃耆甚則陳氏木香

散二十五異攻散二十六肉豆蔻丸四十三可以並

進予長男邦忠方三歲戊子年出痘先翁年八十始

成膿將靨
時泄瀉治
驗

得一孫與先母珍愛甚篤祈禱之事靡日不舉至
 膿成將靨時忽作泄瀉瘡變灰白色先君曰此虛
 寒證命作木香散服之未盡其劑泄止瘡復紅活
 ○時鄰居民曾顯榮長子出痘甚密將靨時亦作
 泄瀉瘡變灰白而又作痒亟來請藥先翁即以前
 未盡之劑姑與服之亦泄止而瘡變紅活不痒矣
 泄瀉古人原有別 腸垢鶩溇分冷熱
 痘中洩水洩血膿 勿使湯丸輕止澁
 經云協熱而利者其腸必垢協寒而利者其溇似鶩

利清水
利膿血

寒則溫之澁之熱則清之通之此古人之治法也痘
 瘡養膿收靨之時有泄瀉者此為大忌恐中氣虛而
 毒復陷也故專以溫補止澁之法為正然有利清水
 者有利膿血者又不可與虛寒者衮衮同論治也蓋
 利清水者曾有大渴飲水過多畜聚於中漬灌腸胃
 今乃作利此畜水泄也水去盡則止利膿血者因痘
 不收以成倒靨中氣充實毒不得留乃自大便而下
 此倒靨泄也泄盡膿血自愈若不知此二證待其自
 愈妄投止澁之劑則根蒂未除枝蔓滋長源泉欲塞

決潰更多吾見其誤死者多矣

黃州府管糧通判蕭壬峯乙丑冬有小姐年七歲
出痘先請杜近林治之黃岡小兒科也連日服保
元湯公因瘡密憂形於色吾縣學掌教許厚峯以
予薦公卽差人請去診視畢告曰小姐表裏俱實
痘雖密順痘也不必服藥公江西贛州府永豐人
彼處出痘者專食鷄予以裏實告鷄不可食公不
聽日取大墩鷄爛煮以汁飲之而小姐嬌養若非
鷄汁不飲也予不能禁揣必有變幸痘正順無傷

也至膿成將靨時忽大泄日夜五六次所下皆清
水公命止之全曰裏氣太實正要泄無餘毒也次
日泄益甚予視其痘飽滿紅潤不與藥服公怒曰
吾女好痘莫有失也予曰保全無失杜亦心疑欲
進肉豆蔻丸予止之而第三日大泄水一行予告
公曰泄止矣公問未服藥何以得止予告曰小姐
飲鷄汁太多汁水畱薄腸胃之間今作泄者名蓄
水泄也

畜水泄不
治自止驗

趙曰臨胸張三陽令孫生痘膿成將靨時下利膿

血眾皆惶懼來問余余曰無妨不必服藥止之泄盡膿血自愈果然

失氣原來足太陰 腸中賁響足陽明

相同泄瀉休差誤 穀氣消亡大限臨

按靈樞經足太陰脾經是動則病得後與失氣則快然而衰足陽明胃經是動則病腹脹賁響可見失氣者脾敗而穀氣下脫也腸鳴者胃敗而中氣下陷也病痘之人不宜有此與泄瀉同皆死證泄瀉者水穀糟粕之物腸鳴失氣腸胃生養之氣也

痘瘡手足最宜溫 熱甚須知毒亦深

若是四肢多厥逆 此為惡候必歸冥

痘瘡手足和煖為貴養漿之時手足發熱手足必有汗此毒熱鬱於中必大小便不通脉沉滑數疾宜利之三一乙承氣湯三十去芒硝主之手足厥逆者此陽

氣欲脫必自利不止或吐脉沉細微弱或浮大而虛宜急溫之理中湯三十四加熟附子或陳氏異攻散

二十服藥後手足和煖者生厥者死若大便秘小便不通煩躁狂妄腹脹喘而渴脉沉滑數瘡不起者此

手足冷主治

陷伏主治

陷伏之證為陽厥百祥丸五十二三乙承氣湯主之十三

漿成毒解貴安寧 臟腑平和神宇清

煩躁不眠何以辨 但從瘡痘認分明

痘瘡始終貴於安靜膿成之時毒已化解臟腑平和

神宇爽快尤宜安靜也若忽加煩躁不得眠者但就

痘子上辨之如膿多清淡尚不滿足此毒猶在裏未

得盡出也龍腦膏主之一百五如膿已成又飽滿因發

熱乾漿而煩者此宜利小便導赤散主之三十如瘡

子太密膿成之後心血虧耗虛煩不得眠者四物湯

膿清不眠

主治

發熱不眠

主治

心血虛不

眠主治

十九去川芎加人參麥門冬梔子仁又酸棗仁湯一百二十

一主之

幾見成漿飲食難 錯喉嘔噦病相干

語言清亮終須吉 暴瘡無聲療莫痊

凡痘瘡密喉中亦有之成漿之時喉瘡早熟肉虛皮

薄易致破損瘡癥新嫩觸之即痛痂皮沾滯痰涎纏

裹所以堵塞飲食難入勉強吞嚥則為疼痛所苦痰

涎所隔是以水入則噎穀入則嘔也如語言清亮者

可治甘桔湯七加牛旁子天花粉利咽膈化痰涎惟

錯喉可治

喉爛不治

喉爛不治

傷食嘔治
驗

傷冷而嘔
治驗

喉舌有痘
嗆水嘔食
治驗

多飲之自然平愈若聲啞嘔語言不出者咽喉潰爛不可治矣

一小兒痘本經疎因傷食腹痛而嘔用平胃散加砂仁藿香葉煨生姜而嘔止

一小兒因食生冷傷脾胃而嘔瘡變灰白用錢氏異攻散加砂仁丁香桂而嘔止

一小兒痘出太密喉舌都是至將靨時嗆水嘔食雜膿血痂皮痰涎而出用甘桔湯加牛旁子頻頻呷之調理而安

失聲逆症
不治

一小兒膿成將靨時忽作乾嘔雖不飲不食常自嘔噦予視其痘不作膿不滿頂曰此逆證也乃誦木陳葉落絃絕聲嘶之言以告之後失聲悶亂而死

痘瘡皮嫩色嬌紅 待到成膿養又攻

調理勿令今有此 除非腫灌痘重重

凡痘瘡皮嫩色嬌者到成膿時多生瘙痒先當調理勿令有此可也若失於早治而發痒者內服消風化

毒湯 八十二 外用茵陳薰法 八十一 破者以白龍散

癩可治症 主治

癩不治症

七十九 傳之。大抵痘瘡作癩，乃是惡候。吉少凶多。如其人能食，或大便堅，抓破之處，復灌成膿，原無痘處，續出大小不等。雖盡癩破，可治。內服十全大補湯，八苦參丸，七十間而與之。外以滅癩救苦散，七十合百花膏，九十塗之。若癩癢之時，其人顛倒，亂抓破之處，不復腫灌，或成坑窟，或即乾黑，或皮自脫，又加以噎水，嘔食，水漿不入，或泄瀉，或寒戰，咬牙，或失聲，或手足厥逆，或狂呼，皆死證也。

待到成膿結靨時，最嫌癩癢，又相催。

苗而不秀，空惆悵。雨打梨花落樹枝。

痘瘡始終所忌者，癩癢也。到得成膿將靨，十分凶險。已過大半，若無癩癢，可計日以求安矣。如作癩癢，吉凶猶未可知。必視其所發，觀其所因，察其情狀，以施治法，以決生死。可以謂之良工也。視其所發者，或發於手足，或發於胸背，拂之則止，禁之則聽者，吉。若發於正面，癩癢不止，皮脫肉乾者，凶。觀其所因者，或因吐瀉少食，脾胃既弱，氣血不榮者，虛癩也。可用陳氏溫補之法，則癩可止。或因穢惡之氣，觸動邪火者，暴

癩吉

癩凶

虛癩 穢冲癩

痒吉

痒吉

痒凶

痒也。惟用薰解之法即止。或因痘瘡已熟邪氣盡解。正氣漸生。氣血調和而痒者。此美疾也。不須服藥。若無所因。自生瘙痒者。原自惡痘。不得善成。察其情狀者。如瘙痒之時。乍作乍止。精神清爽。不自抓搔。欲人撫摩者。生若搔痒無時。神識昏沉。胡抓亂舞。搖頭扭項者。決死勿治。

治手握驗

胡三溪幼女。今與王小亭之子結婚者。年七歲。庚申夏出痘。初發熱時。兩手如撚物狀。時喻正甫亦在。予曰。此肝病也。經云。其為病也。握宜平。其肝以

治水痘發 痒驗

瀉青丸方。去大黃。加甘草。柴胡。青皮。一服而握止。予欲再進一劑。其母匡氏不喜。喻順其情。呼曰。好痘。沮其用藥。予曰。噫。凡肝病者。多水痘。而作痒。吾欲止之於未發之前。既不肯聽。七日後再議。予但言用心守護。時喻即稱好痘。以沮之。果至第六日夜。面瘡盡抓破矣。匡乃大哭。請予治之。喻亦嘆曰。何變之速耶。予曰。向欲預防此變。爾等不信。今何嘆惜哉。請勿憂嘆。予能治之。乃用保元湯。加防風。白芷。一服而痒止。再服而著痂。面瘡亦平。

痘瘡洋正
面不可傷

正面諸瘡不可傷

略傷一處便非祥

當時即止渾無忌

破盡須教目下亡

桔

凡視痘瘡以正面為主五臟精華皆萃於面故也身
上瘡有痒者或至抓破不能為害惟正面瘡不可犯
動一處苟於眉目鼻面之間抓破一處此肺有熱也
急用甘桔湯七加牛旁子以解之其痒即止乃佳兆
也若痒不止浸淫漸開氣愈泄而痒愈急必至滿面
抓破而死

額上瘡如沸水澆

溶溶破爛不堅牢

漸延面頰都如是

洩盡元陽限到頭

凡瘡痘起發養漿之時額上瘡如火燒湯澆之狀潰
爛破壞無復完膚或兩頰之傍亦如是樣不待抓搔
而自破爛者以漸而開沙崩之勢莫之能禦穀焦水
去似靨非靨陽氣脫而死

準頭唇上與眉心

耳畔諸瘡不可輕

膿未得成先黑靨

莫將乾較語時人

倒陷不治

痘瘡作漿之初面上諸瘡未盡成膿或鼻準頭瘡先
乾如橘子色者或眉心瘡自乾黑者或唇上瘡焦黑

倒陷不治

者。或兩耳上瘡。自收者。或兩頰瘡。如餅中間乾陷者。此名陷倒。乃死之候。不可認作正收。對人妄言。

面上乾靨
治驗

本邑庠生胡近濱。吾先師柳溪仲子也。與予有兄弟之好。乙丑歲。二女出痘。請予調治。長女順吉。次女痘將養膿時。面上有乾靨者。犯倒陷逆證。原無治法。奈夫婦平日相敬托重。吾乃主一方。用黃耆、人參、甘草、節、當歸、赤芍、藥、生地黃、金銀花、牛蒡子、連翹、麻黃、密酒拌炒黑、紅花子、水煎調。穿山甲末。且告之曰。此藥服後。若瘡先乾者。復起作膿。未乾者。胖壯飽滿。痘空地上。再出小痘。上也。痘不作膿。不補空。或發癰腫。次也。否則無所為計矣。連進三服。已乾者不腫。未乾者飽膿。空中補痘不多。手足發癰。後以十全大補湯。加金銀花、連翹調理而安。

兩頰先乾
皮肉木硬

○蘄水縣丘蓮塘李子出痘。其母珍愛之。痘至作膿。瘙痒煩哭。亟請予往治之。見其面瘡磊落。紅綻膿漿未熟。兩頰先乾。皮肉木硬。因其珍愛之心。難以凶告。但曰。左頰屬木。肝也。肝主血。藏魂。右頰屬金。肺也。肺主氣。藏魄。兩頰木硬。氣血不榮。魂魄不

靖所以煩哭也。蓮塘夫婦固請用藥，許酬百金，予辭不能治，欲解其毒，則中氣反傷，欲補其中，則邪火正盛，固而告退，是夕加煩而死。

手足諸瘡要飽漿，充肥蒼臘喜脾強。

淡清虛鼈多灰白，縱得乾收有後殃。

手足痘瘡最要膿漿飽滿，乃脾胃強氣血足也。若灰

白色或清淡水，或虛餒鼈塌，此脾胃弱快班越脾湯

主之。一百如此者，縱得收靨之後，必手足腕膝及關

節之處發癰毒也。

手足膿飽

吉

手足痘色

灰白膿清

水治驗

兩臀肩背諸瘡子，展轉揩摩最受虧。

惟有正瘡能耐久，不然粘着便無皮。

痘瘡初出起發，邪氣雖旺，正氣亦強，足以任之。至於

成漿，則氣血漸耗，精神漸弱，有不勝之狀。起止艱難，

多喜仰臥，惟肩膊背臀之瘡，展轉摩擦，最受虧苦。若

痘子好者，自然堅厚耐久，不破。其次則收靨稍遲，膿

自潰，最可惡者，如湯火之疱，水去皮脫，又瘡自破，清

水非膿，黑黢乾焦，是皆不治之證。

纔試漿時未飽囊，瘡頭有孔漏膿漿。

肩膊背臀
痘膿有自
潰者亦吉

不治症

依然團聚封瘡孔 洩去真津毒氣藏

漏瘡凶

痘瘡作膿窠之時最要皮厚包裹完固苦膿未成忽
然瘡頭有孔其水漏出或結聚成團堆於孔外者或
水去窠空自乾黑者俗名漏瘡必死若膿熟之後窠
皮亦熟漿水沸出因而結靨此頭額正面之間多有
之俗謂之堆屎收不可以漏瘡例論蓋漏瘡膿未成
堆屎收膿過熟也

遍身瘡痘作膿窠 涕唾稠粘咯吐多
強忍直當收靨後 自然毒解得平和

涕唾稠粘
說的有理
主治

瘡痘者每至作膿窠之時咯唾痰涎稠粘濃結或有
膿血夾雜者咽喉不利飲食亦少此肺受火邪津液
不足故多粘痰喉舌牙齒之間瘡潰血出惟用甘桔
湯七加牛旁子天花粉清肺化痰利咽膈直待收靨
之後自然平和不可妄用大涼之劑

瘡痘膿漿賴血成 幾何津液受薰蒸
舍空血耗神明亂 睡裏呢喃喚不醒

痘內之膿皆身中之血薰蒸而成瘡痘稠密膿血周
遍津液消耗心主血血虛則舍空故心熱者虛煩不

心虛不眠
主治

睡裏說話
主治

得眠酸棗仁湯主之一百一十一心虛者喜睡夢中呢喃
如與人言者多惟誕之事喚之不醒安神丸主之四十七
若昏悶甚者先以龍腦膏一百五開其心竅後以安
神丸七十人參麥門冬湯下

蘄水縣徐桂山子文禛年十七辛卯冬出痘請予
調治至膿成將靨時忽發狂妄語起舞或毆人或
罵人皆平日讎恨者一身之瘡盡迸破矣父母恐
有魘叱亟請田道讓之田師者一時高明法士也
殫盡其術病者越宿不少寧乃問予予曰信巫不

夢狂治驗

信醫待巫無驗吾方治之田亦自知非魘乃告予
曰請用藥治勿相拘也吾用安神丸一百粒作二
次服良久始省問其所為夢也

起發成膿未失期 渴而飲水不須疑

氣虧血少無津液 潤燥生津法更奇

痘瘡之出全資氣血之養以致成就今痘出太密取
用過多氣不期而自虧血不期而自少故津液不足
咽乾膈焦而渴也法宜養氣生血益津潤燥人參麥
門冬散二十葛根解毒湯二十主之切不可冷水

渴主治

渴禁忌

西瓜、紅柿、梨、蔗、菱、藕、生冷之物及寒涼之藥損其胃氣則津液不生煩渴不止而變生焉。

渴治驗

麻城鄒清溪子出痘至養膿時大渴不止予議用人參麥門冬散傳醫即依本方脩合予謂之曰此乃瘡出太甚津液不足之證白朮燥津液茯苓滲津液皆所禁也吾借古方兩行已意教以本方去白朮升麻加生地黃天花粉知母淡竹葉只一服而渴止。

吾邑萬賓蘭長子癸丑年出痘至養膿時大渴不

渴治驗

止予用人參麥門冬散去白朮升麻加生地黃天花粉作大劑代湯飲之一服而止。

膿窠已作中無毒。腹痛多因燥屎攻。

若是便清曾受冷。好將湯散急溫中。

痘瘡初出腹痛者毒在裏也。桂枝大黃湯二十起發

不透腹痛者陷伏也。三一承氣湯三宣風散九十一作

膿腹痛者毒已出又無陷伏其人不大便者必燥屎

也當歸丸一膽導法五十以通之便清者必受冷也。

急與理中湯三十加桂或黃耆建中湯三十加木香

初出腹痛
主治起發
不透腹痛
主治
便秘腹痛
主治冷痛

主之

表裏無邪一向安 忽然腹痛又加煩
痘瘡色變成灰木 此侯曾因飽食干

痘瘡其出已盡其發已透其膿已成表無邪也能食
小便清大便潤裏無邪也一向平安忽然腹脹作痛
煩噪喘促痘瘡色變如灰木之狀此必傷食得之先
以丁香脾積丸三十原物湯下去其宿食後以人參
白朮散二十去葛根加青陳橘皮與養脾丸一百相
間調之

傷食腹痛
主治

傷食腹痛
治驗

腹脹作痛

蕪水縣陸沉港李宅一女出痘與策湖景氏結親
至膿成將靨時忽腹脹且痛氣喘呻吟予適在彼
縣請予治之予視其病瘡既胖壯膿又飽滿診其
脉弦滑予曰此非痘毒乃傷食也因問曾食雞肉
糯米飯予曰宜亟下之女之祖曾為教官知醫乃
曰痘瘡首尾不可下恐虛其裏不得靨也予曰病
不執方藥貴對證有是病則投是藥下之無妨遂
以原物作湯吞丁香脾積丸得利而安
英山縣南門金宅一子出痘成膿時忽腹脹作痛

氣喘煩悶
傷食腹痛
主治

氣喘煩悶予在馬四衢家請予視之其痘光壯飽滿非毒也必曾傷食來問之果因麵食過飽乃用原物湯送下丁香脾積丸得利病稍定再用錢氏異攻散加青皮山查只一服而愈

未得成膿先潰爛 此候得之輕發散

除非脾胃本來強 曾見幾人成倒陷

痘潰爛失
發散

夫痘瘡膿熟潰爛者常候也若未成膿先即潰者此各斑爛斑爛之由病當發散而不發散則毒氣閉塞喘促悶亂不當發散而誤發散則熱毒隨陽氣暴出

妄發散潰
爛主治

過法表內
虛自利斑
爛主治

遍身皮肉潰爛此不善表之過治之宜調脾進食令大便得所安養榮衛生肌解毒解之不至於冷調養不至於熱方為良法宜十全大補湯三十去桂加防風荆芥穗多服佳大便秘以膽導法五十潤之膿水不乾以敗草散八襯之斑爛作膿痛甚者以天水散九十和百花膏九十塗之又有發表過甚外為斑爛而內虛陽氣不守臟腑自利此又急當救裏解表陳氏木香散主之二十厥逆者異攻散二十本邑二尹雷有齋次孫五歲辛未正月出痘請予

衣厚潰爛
治驗

第四男邦治調治此孫嘗結拜萬東泉世喬號也
 作恩父世喬恃熟專恣無忌邦治用藥必力沮之
 其孫衣以厚綿圍以厚被日夜向火偎抱任其飲
 酒未七日而靨子聞日期未足其收太急親往視
 之見其自面至腰潰爛平塌無作痂者乃告之曰
 此非正收是倒靨也亟用托裏解毒之藥解去衣
 被再勿近火飲酒可保無事因立一方以黃耆白
 芷排膿托裏防風蟬蛻以疎其表青皮桔梗以疎
 其裏牛旁子甘草以解其毒只一服而潰瘡復脹

大便膿涎此毒氣中外無留矣予辭歸又告曰勿
 再服藥恐生他病

痘瘡磊落本無多
 到得成膿不結窠
 不是脾虛常食少
 定知陷伏認差訛

脾虛陷伏
不結窠

曾見痘瘡初出磊落起發亦透只待結膿窠之時却
 不作膿往往變為壞證者或因其人不能食脾胃虛
 又自利不知調理者或出未勻發未透毒氣陷伏妄
 談稀疎者此皆人事之不脩非干時毒而然也
 失聲四證要端詳
 肺濁心微聲不揚

哭語無聞因腎怯

啞喎不出是咽傷

失聲可治
主方

失聲之證痘瘡所忌當於養膿結靨之時候之有吉
 有凶不可一槩作凶斷也此有四證如聲濁不清響
 者此毒火上薰肺先受之肺主五聲肺熱則脹孔竅
 閉塞命書云金空則鳴金實無聲是也甘桔清金散
 主之七附方如聲小氣短近聽則聞者此心火太亢血
 稿氣消故雖有聲而不遠揚叔和二云聲言爽氣清是
 也導赤通氣湯主之三十五附方此上二證可治○若啼
 哭無聲而見其淚出語言無聲而見其口動者腎敗

失聲不可
治

也其聲啞喎如破如硬者此咽喉潰爛也此上二證
 不可治

婦人痘成
膿經行失
聲治驗

予長子邦忠李媳已酉冬年十八歲出痘居經未
 行至成膿時經水忽行所下血塊且多吾妻錢氏
 以告未逾日李媳猝失聲不言問之但搖頭垂淚
 自知必死家人惶惶以辦後事予思痘瘡變黑歸
 腎宜有猝失聲之證今痘已成膿飽滿紅潤何以
 有是逆證也沉吟良久亟呼邦忠曰勿亂吾得之
 矣內經云婦人重身九月而啞者少陰之脉不榮

於舌也。手少陰者心也。心生血。諸瘡皆屬於心。瘡毒之火內起於心。迫血下行。故經血來也。舌者心之苗。血去則心血虛。不能上榮於舌。故舌萎縮而猝失聲不能言也。乃以生脉散去五味子。加當歸身。生地黃服之。良久李媳乃言曰。爹爹此藥靈丹也。後以十全大補湯加麥門冬調理。

蕪水縣蕭家有一子三歲。癸未春出痘。請吾長兒邦忠治。將靨時忽失聲。邦忠以問予。予乃示以四證。忠曰啼哭有聲。但言語重濁不清響也。予曰此

言重濁治驗

肺熱也。教以甘桔清金散服之而安。

寒戰咬牙雖不祥。養膿結靨更宜防。

能將形證分凶吉。可許嬰童司命良。

痘瘡所忌者寒戰咬牙二證也。單見且凶。况雙見乎。

養膿結靨之時尤不可見。然亦有吉。有凶。不可不辨。

也。如掀腫紅紫。大小便秘。煩渴飲水。此表裏俱實之

證。戰者瘡痛而振搖也。咬牙者忍痛而咬其牙也。乍

作乍止。宜四順清涼飲。二十加連翹木通。金銀花主

之。○如青乾黑陷。大小便不通。煩躁大渴不止者。此

寒戰咬牙可治主方

例陷不治

虛可治主
方
倒瀝不可
治

純陽無陰之證宜防風通聖散四合棗變百祥丸百一

二十主之若腹脹氣喘譫妄足冷者倒陷也不治○

如潰爛灰白泄瀉不止者此純陰無陽之證宜陳氏

木香散二十異攻散二十主之若瘙痒悶亂腹脹氣

喘足冷者倒瀝也不治

本邑胡玉峯第三子庚申夏出痘甚密請予調理

予曰此兒脾胃素弱當用補脾之劑使氣血旺而

痘易成就也玉峯不聽至成膿後過期不瀝遍身

潰爛寒戰咬牙失聲悉具玉峯恐不祥三請匠合

寒戰咬牙
失聲治驗

木而吾三逐之玉峯問其故予曰戰者遍身潰瘡

坐卧艱難不能自任非鼓領寒戰也咬牙者齧瘡

作痒相戛而鳴非神昏鬪齒也失聲者欲得肉食

公不肯與日夜啼哭得之非咽爛嗆水也公不用

吾言以致此極若肯進補脾之藥則即瀝矣乃從

吾言予用調元湯加防風白芷暗入熟附一片連

進三劑而安

趙曰家二兄長子生痘收瀝至腰以下頭上四肢

尚未瀝家兄喜得痘瀝邀不佞與舍五弟同往觀

之遂犯客忤我等既出，即面上發痒，將面上痘瘡
 抓破，紅血淋漓，即寒戰大咬牙，至天明身上痘復
 起，貫膿，寒戰咬牙，正不知所以，及喂飯時，見後槽
 少一齒，於大便內循出，原齒已化去一半，可見人
 牙發痘之益，謂能乾喉不用者，誤矣。

趙曰：臨朐馬庠生令郎，生痘歷時，寒戰咬牙，醫官
 李重興來問余，余荅曰：吳東園要訣辨之，謂陽明
 熱也。李醫官遂用紫草、甘草、當歸、防風、陳皮、赤芍
 等分治之而愈。

欬逆嘔噦
 惡候

欬逆原知有幾般，此名惡候古今傳。
 若逢嘔噦須同論，莫作尋常小病看。

欬逆嘔噦三者皆惡候也。諸病深者不宜有此。况痘
 疹乎。欬逆者如噎食噫氣之狀，俗呼吃逆者是也。欬
 逆之聲小且短，其氣似入而非入。嘔噦之聲大且長，
 其氣似出而非出。嘔者聲清，噦者聲濁，皆有聲無物
 也。大抵諸病之證，曰火曰痰曰虛。惟痘瘡專主火主
 虛也。經曰：木陳者葉必落，絃絕者聲必嘶。病深者聲
 必噦。由此觀之，其為死證明矣。

欬逆便秘
治驗

本邑庠生李光庭龍泉之子也十九歲出痘請吾
 與韓鳳岐治之十日後膿成將靨忽作欬逆診其
 脉促而代予謂韓曰欬逆者惡證也促代者怪脉
 也痘瘡順證飽壯明潤何以得此脉證也韓亦憂
 疑龍泉子母惶惶也予思欬逆三證一曰胃寒二
 曰水逆三曰胃敗皆不相干經曰諸氣逆衝上皆
 屬於火此火氣炎上之象乃問其大便何如曰自
 出痘到今七日未更衣也予曰燥屎壅塞下竅不
 通毒火炎上出於上竅故欬逆也促代之脉得之

欬逆氣逆脉亦逆也又取猪胞導之取下燥屎欬
 逆即止而脉亦調勻也故治病之工不可不思

痘瘡正色喜紅鮮

到得膿成又不然

曰白曰蒼皆正色

若猶紅嫩轉成慙

成膿忌紅嫩

邵堯夫曰東赤南白西黃北黑此正色也驗之於曉
 午暮夜之時見之矣此一陽之氣色色之遞變也故
 東赤者乃一陽發生之氣如木之始萌也遞而變南
 白者乃長養之氣如火之大明也謂之白者非素白
 之白乃潔白之白也遞而變西黃者乃收斂之氣如

金之從革也。通南變北黑者，乃閉藏之氣如水之潛伏也。若痘瘡初出一點血，東赤也。血化爲水，南白也。水化爲膿，西黃也。膿乾爲疔，北黑也。亦一陽之氣色。色通變皆正色也。假如痘瘡膿成，將靨之時，猶帶紅鮮之色，反爲逆證。故以灰白蒼臘爲得秋冬之正氣也。

蘄水縣徐淑道，乃吾縣蕭桂屏之外甥也。十三歲丁亥年，在蕭宅出痘，請先君菊軒翁醫治。一日歸家而嘆，全問曰：父有何事嘆惜？先君曰：蘄水徐某

在此出痘，父喪母寡，今不可治矣。全問其證，先君曰：痘已成膿，只待收靨，今變黑歸腎，故不可治。全曰：我能治之。先君曰：信能治之。徐氏不絕，乃以全語告。桂屏親請予往視之。痘子磊落，膿漿飽滿，神識精爽，語言清亮。自告予曰：先生救我，願酬五十金。問其大便，五日未通。全告先君曰：此痘正宜收靨，裏實熱蒸，故潰爛也。其色蒼黑，亦正色也。但解其裏，則卽靨矣。先君問以何方，全曰：四順清涼飲與之一服，下燥屎二十餘枚，痘隨收靨而安。先君

便秘痘爛
不靨治驗

問全曰汝向志在功名未曾習醫何以知其變黑爲正色非歸腎也全曰此在邵子皇極經世中乃誦其東赤南白西黃北黑之言而詳解之先君喜曰吾聞醫出於儒爾能承吾之業吾有後矣

本邑汪汝愚乃大賓之次子大川之侄也大賓早被雷厄有三子長子小子皆死於痘汝愚痘將靨灰白潰爛神昏不醒大川亟請予往大川蓋嘗妬害吾者乃焚香對天告曰昔日倡謀害某者乃胡明睿蔡惟忠惟孝也協和之罪川不敢辭予笑曰

潰爛不治
自愈之證

雄蜚雌伏是亦有數吾安敢尤人哉川曰先二侄者非不請公因此嫌疑故不敢請此侄之病與前相似又不得不請也幸而得生吾弟有後矣但恐不可治也予請視之曰無傷也不必服藥但與公同守三日收靨也川問若不服藥何以能痊予曰瘡白者乃熟太過而白如果熟潰爛之狀非虛也神昏者乃邪盡正迴否極泰來之兆非昏瞽也再待三日則正氣復而病痊矣川旣聞予不必用藥之言又見予願守保全之意所以前疑盡釋而收

勿藥之功

○痘瘡養膿決生死訣

一養膿時只是清水皮薄如水泡者三四日後決瘡
痒抓破而死設不痒癩亦發癰而死勿治

一養膿時乾枯無水都是空殼決作瘰癧或發癰而
死勿治

一養膿時未成膿漿猶是血水忽然乾收者決死勿
治

一養膿時忽然作痒正面抓破皮脫肉乾黑者決死

勿治

一養膿時忽然泄瀉日夜無度湯丸不效足冷者決
死勿治

一養膿時忽然大小便出血者決死勿治

一養膿時發狂譫語大便不通腹脹氣喘足冷者決
死勿治

一養膿時或瘡色青紫或帶灰白寒戰咬牙失聲者
決死勿治

一養膿時腹脹氣喘足冷悶亂者決死勿治

痘疹世醫心法

痘疹世醫心法卷之六

羅田 密齋萬 全集

平原 熙齋趙 燁 校

夏邑 嵩螺彭端吾 重梓

收靨證治歌括 凡一十九首

膿窠結就正鮮肥 瘡頂微焦欲靨時

漸次乾收無急慢 痂皮圓淨轉春暉

痘瘡成膿之後鮮明肥澤飽滿堅實以手拭之瘡頭微焦硬者此欲靨也大小先後以漸收靨不失太急

正靨

不失太緩已。屬者。痂殼。周圍。無有。凹凸。陷凹者。乾淨。無淫濕。破濺者。此為正。屬否極泰來之象也。

痘瘡收靨有真訣。面上身中要合格。

面上吐漿頂聚珠。身中結疔堅如墨。

收靨合格

凡痘瘡收靨之時。面上是一樣收。身上是一樣收。謂之合格。乃正靨也。若面上如身上收。身上如面上收。謂之不合格。乃倒靨也。面上痘瘡收格。痘頂吐膿。結聚如珠子樣。滿面皆然。磊落可觀。惟兩耳與身上。同身上痘瘡收格。皮膿乾結。如螺靨樣。緊淨堅厚。易自

脫落。

收靨如將日數拘。幾會算得不差殊。

但憑本痘分疎密。更向其人論實虛。

論收靨不將日數拘看痘疎密人虛實

俗謂幾日發熱。幾日出形。幾日起發。幾日作漿。幾日收靨。此大略之言耳。痘有疎密。毒有微甚。人有虛實。豈可一切拘以日數。如瘡本疎者。其毒微。其人中氣實。又能食。自然易出。易靨。固不待於旬日者。如瘡本密者。其毒甚。其中氣實。又能食。榮衛調和。內外無諸傷犯。至十二三日。可以刻期收靨也。若其中氣

虛食少或內外曾有傷犯或遇氣候乖變因而難靨豈可必拘以日數哉

痘瘡收靨已無邪 不疾不徐乃更佳
太疾却防餘毒壅 太遲潰爛不成痂

治靨太急主

凡痘瘡收靨之時毒邪已解只要先後有次疾徐得中如收太急者毒邪未盡煎熬津液以致速枯必為目病為癰毒為諸怪疾甚至橫天宜微利之以徹其毒當歸丸主之 一百如收太遲者中氣已虛脾胃太弱不能榮養肌肉使之完就以致潰爛內服十全大

治靨太遲主

補湯三十外用敗草散八十視之

收靨太急而無完瘡不治

英山縣沈瀚乙丑春一女年十九出痘其婿鮑宗義之子也因痘收靨不齊予在孔家坊教書請予視之起發未透膿漿未成收靨太急非正靨也適占得渙之巽卦予曰痘證既逆卦象又凶病不可救矣果歿一子十歲出痘將靨時亦與其姊前証同蓋厲氣傳染也及問卜又得渙之巽卦人皆憂懼亟請予治予曰勿憂此病可治其婿曰同一病證同一卦象在吾妻則不可治吾舅則可治者何

收醫急可治

也。予曰：以病言之，今正收醫太急，面無完瘡，故曰不治。令舅面瘡半醫，膿腫尚存，故曰可治。以卦言之，先以夫占妻，用財為主，卦中無財，兄弟發動，又尅妻財，所以凶也。後以父占子，用子為主，子孫旺相，兄弟發動，能生其子，為子之元辰，所以吉也。後果然無事，瀚曰：密齋不但善醫，而又善卜，聞者領之。

當收不收瘡潰爛，以法求之，要着痂。

內外審候是何變，痂不得成，為倒醫。

天寒失蓋不收主治

天熱過溫不收主治

便秘不收主治

瀉不收主治

痘瘡過期不收，遍身潰爛者，此與斑爛不同，乃熟太過也。其候不同，或因天寒失於蓋覆，使瘡受凍而不

收者，宜服五積散八十，外用乳香燒烟於被內薰之。

或因天熱過求溫煖，使瘡被蒸而不收者，宜內服人

參白虎湯二十，或五苓散二十，外減去衣被，令少清

涼，以天水散九十撲之，或大便便秘，結內外極熱，毒氣散

漫無陰氣，以斂之而不收者，宜內服宣風散九十，或

三黃丸八，四順清涼飲二十，外用膽導法五十，以敗

草散八十，視之，或泄瀉氣虛，脾胃弱，津液少，肌肉虛

過飲不收
主治

而不收者宜內服陳氏木香散

二十

外用敗草散

十八

食少不收
主治

或因渴飲冷水過多以致水漬脾胃濕淫肌肉而不收者內服五苓散

二十

如因食少氣虛而不收者人參白朮散

二十

三

去葛根加桂主之已上諸證以法治之已潰者結薄痂未潰者結痂方為佳兆若痂皮俱不結者成倒靨矣

本邑庠生胡小山長女汪四竹之妻未嫁先出痘甚密膿成過期不靨請予調治此女平日脾虛食少性不肯服煎劑予乃以錢氏異攻散加木香青

脾虛食少
不收治驗

皮煉蜜作丸米飲送服調理而安又庠生胡仁山小山之子也幼時出痘甚密膿成不靨漸至潰爛請予調治予問自起發以來未得大便裏實熱蒸故不成痂議欲下之小山曰此子素弱恐不可下時有一法士王克廉在符水甚靈乃書一符焚而服之少頃腹中鳴而利所下清水眾皆稱謝予亦喜之但思許久未便豈無燥屎今所下清水乃一氣成符之驗待至次日痘益潰爛予作膽導法取下燥屎三十餘枚如彈子大衆又

便秘不收
治驗

皮煉蜜作丸米飲送服調理而安

又庠生胡仁山小山之子也幼時出痘甚密膿成

不靨漸至潰爛請予調治予問自起發以來未得

大便裏實熱蒸故不成痂議欲下之小山曰此子

素弱恐不可下時有一法士王克廉在符水甚靈

乃書一符焚而服之少頃腹中鳴而利所下清水

眾皆稱謝予亦喜之但思許久未便豈無燥屎今

所下清水乃一氣成符之驗待至次日痘益潰爛

予作膽導法取下燥屎三十餘枚如彈子大衆又

笑曰此法更妙痘即收靨齊腰又不收大便自燥屎初下一次又未行也予曰作符乎作膽導法乎王師亦曰不如膽導法再取下燥屎十四五枚後皆澹糞痘亦收盡而安王克廉氣字符法自此大行

過飲不收
治驗

一小兒因渴飲水過多濕傷脾胃不能收靨以四君子湯以人參補中白朮燥濕茯苓滲水甘草解毒加防風以勝皮毛之濕白芷以逐肌肉之水桂以利關節而去寒水之邪砂仁以溫胃止渴調理

便秘不收
治驗

而安

一小兒大便不通熱蒸於內而生其濕以致浸淫不能成痂用當歸稍生地黃以涼血麻子仁以潤燥酒大黃以瀉熱開結生甘草以和中得利而安

泄瀉不收
治驗

○一小兒泄瀉不止食少此裏虛不能收靨用陳氏木香散合肉荳蔻丸服之而安

趙曰臨詢一小兒四歲正月二十九日出痘長貫各依日期貫漿略不足至十日當靨不靨發癢面上略有烏色身上白色擦破有出血者有無血者

頭腫身不腫腹不脹好飲水寒戰說吃乳口吃不得至今十二日未靨一顆余令用十全大補湯加防風白芷癢止收靨而痊

趙曰臨胸庠生傅博學一小兒四歲出痘至十四日當靨不靨口渴腹脹作瀉發癢飲食少自出痘飲涼水多不食余曰此水之為害渴瀉不妨用十全大補湯因瀉減地黃因癢加白芷因渴加五味麥冬前症悉除收靨而愈

遍身潰爛少完膚

膿血淋漓勢已痛

坐臥不能惟用襯

癩痕欲滅却宜敷

潰爛主治

痘已成膿之後過期不靨以致潰爛膿汁淋漓不可

着席粘惹疼痛者用敗草散八十或蕎麥粉一百二十

以絹袋盛於身體上撲之更多佈席上襯臥尤佳面

上欲不成癩點者用滅癩散七十八和百花膏九十

敷之

本邑民蔡承盛一子出痘甚密先請吾妾兄甘大

用醫吾所傳者至膿成後過期不靨面瘡潰腫起

止呻吟嗆水吐食語音不清甘謂不治而去復請

過期不靨
嗆水吐食
語言不清
可治者治

驗

不可治

予治予視其病面瘡腫起正在貫腫遍身皆然非倒靨也。噎水嘔食者口唇腫硬吞嚥不便非咽喉潰爛也。語音不清者鼻中壅塞氣不得通非失音也。瘡毒盡出表病裏和可治也。乃製一方用苦參酒浸牛旁子白蒺藜何首烏荆芥穗各等分爲細末酒糊爲丸淡竹葉煎湯下調理一月而安矣。

時鄰居一小兒病證相同亦請視之予曰不可治也。或問何故予曰證不同也。彼痘過期痘熟宜靨此痘猶生未得成膿不宜靨者一也。彼痘腫脹猶

貫膿血此則面平日開皮脫肉乾二也。彼痘喉舌無瘡此則咽舌潰爛噎水失聲三也。彼家私與蔡氏求藥服之無效而死。

胡三溪長女十三歲庚申夏出痘甚密請喻南麓醫其母匡氏之意喻先學醫於我不知治痘之法只以參耆大補之劑服之二十日後過期不靨予往視之念三溪之好也見其瘡已潰爛幸非倒靨乃犯溫補藥多裏邪盡出表毒不解急宜解表勿使皮肉腐爛喻猶強執爲是匡亦深信不悟又過

妄補不收
治驗

五日不收復請吾長男萬邦忠予教用防風荆芥升麻以解表勝濕白芷以蝕膿逐水連翹牛旁子甘草以解其鬱蒸之毒肺主皮毛因參耆之補肺熱且甚時值夏火正旺用黃芩酒炒以瀉肺中之火解時令之熱調理至一月而安

但到收時膿自乾

收藏斂束貴周圓

莫教潰爛痂皮嫩

至此還將倒靨看

痘子初出磊落成箇後來長大作膿始相連串外雖相串皮下猶一箇是一箇至於結痂腫消膿乾現出

倒靨

初來本形所以收藏斂束要完全堅厚復成箇數爲貴或根脚相通皮肉盡串者結痂之時亦要乾淨無有淫濕及濺破者次也若未成痂者潰爛已成痂者只是嫩皮此倒靨也

蘄水縣株林舖董希周一女十九歲辛丑十二月申旬出痘請醫江萬吉治延至歲終不得收靨精神已昏飲食俱廢江不能治而去時予在沙畝徐淑道家治痘強畱過歲壬寅元旦希周自來懇請予往視之僵臥如死人任其開衾詳看而不知也

痘逆脉好
可治者治
驗

乃診其脉洪實調勻其祖父廷憲在素知醫者予告之曰此痘倒靨逆證也不可治惟脉洪實調勻不疾不遲予今棄證從脉治之若得壞瘡復起新痘復出人事清爽飲食如常則無事矣乃用升陽散火湯加黃耆當歸木香青皮連進三劑初三日復出一層新痘舊者盡乾初五日出盡周匝一身病者亦漸甦省能言語求飲食矣依期起發養膿至十三日而靨後以十全大補湯調理希周父子拱手謝曰此病平生罕見皆曰不可救矣非國手

回生起死之力此女之病決不能保予曰痘瘡倒靨必歸於腎今幸得愈猶當慎目疾也宜預解之希又不聽半月後右目病不能開果喪明矣

痘臭須知有幾般

時師莫把混同談

養膿有覺為凶兆

結靨纔知作吉看

難經云心之臭焦肝之臭臊脾之臭香肺之臭腥腎之臭腐五臭皆屬於心故曰臭從火化也內經云諸痛癢瘡瘍皆屬心火故痘瘡之證心火主之凡論痘瘡到結靨時纔有臭者此痘子成熟之氣邪氣自內

醫特臭吉

膿時臭凶

五臭吉凶
斷

而出也。吉。若養漿之時，即有臭者，此毒火薰蒸之氣，積於中而見於外也。凶。又或瘙癢抓破及潰爛腫灌之時，其臭焦者，心火盛也。危。其臭臊者，肝火盛也。死。其臭腥者，肺火盛也。危。其臭腐者，腎火旺也。又為腐痘之氣，必死。不治。惟臭香者，脾也。水穀之府，無所不受。故吉。

收靨元來貴整齊

臭腥潰爛事生疑

過期見此還為順

未及收時作逆推

痘瘡收靨圓浮堅厚，如螺靨者，上也。頭穿膿出堆聚

過期臭吉

未及期臭凶

不治症

成痂如雞矢者，次也。皮破膿出，痂薄如紙者，又其次也。皮爛膿潰，不成痂皮，膿汁腥臭者，斯為下矣。如已過期，譬如瓜果熟久則爛，此造化之常，還作順看。若未及期，則為斑爛，乃逆候也。變倒靨而死。

本邑庠生盧牛默，予之專門弟子也。前妻李氏出痘甚密，未及成膿，面瘡自破，皮腫膿聚，氣多腥臭。過期不靨，飲食漸少，錯喉嗆水，請予視之。曰：形證俱惡，恐不得痊，延至二十餘日而卒。

倒靨誰知毒入裏

死中求活治得理

便秘腹脹急下之

自利要將來物取

自利虛溫之方

秘下主治

利膿血痲皮順症不須治

痘毒當醫不醫復入於裏者謂之倒醫此死證也元氣素怯又不食常自利者陳氏木香散二十異攻散二十六十死中求活聖藥也如原無泄瀉大便久秘今添腹脹喘呼此毒盛薄蝕元氣復入於裏宜急下之排毒散一百二若不急下則腸胃不通榮衛不行益加喘滿躁悶而死矣若毒入裏忽然自利者此人脾胃素強毒氣難留故自利須看利下之物如利痲皮膿血者毒氣得出為順不可止之待利盡膿血自愈如

利水穀逆症不可治

利水穀者此毒氣反驅水穀脾虛不能制之其證為逆不可治也

趙曰臨胸一小兒生痘當醫不醫元氣素怯又不食常自利余令服陳氏木香散二十收醫而痊

又一小兒生痘當醫不醫大便久秘今添腹脹喘呼此毒盛薄蝕元氣復入於裏宜急下之余命服排毒散一百二每服五分用長流水煎滾調服下利二度前症悉退收醫而愈

原瘡潰爛復成瘡

痘出重重漸作漿

靨後復出一層小痘者吉

此候未曾成倒靨

便堅能食得為良

如食少主治

如痘瘡破損潰爛者復腫灌作瘡不致乾枯原無痘瘡處復出一層如初出之狀亦以漸起發作膿者此裏氣充實毒不得入猶在於表未成倒靨逆中之順證也但瘡子重出一番必其人能食大便堅足以勝其再作之毒如食少大便潤者用十全大補湯三十人參白朮散三十相間服之自利者陳氏木香散二十五異攻散六十肉豆蔻丸四十主之蓋病久氣虛惟利溫補不可再解毒也

靨後復出小痘佳兆

一小兒痘靨後復出一層小痘其家驚憂請予予見之曰此佳兆也痘科云輕者作三四次出大小不一等重者一齊湧出此痘最輕且無餘毒發得盡也其家喜而酬之

本邑胡若泉一子三歲出痘請予長男邦忠醫請予視之予曰毒氣有餘穀氣不足此兒食少故不靨也問服何藥予謂邦忠曰無藥可解能食則生不能食則死次日思食所食且多予聞之嘆曰死亟矣邦忠亦疑曰父親云向能食則生不能食則

除中不治

死今能食而曰死亟人皆笑之予教之曰謂之能食者一向不食而今思食自少加多胃氣復也今忽多食者乃胃敗火盛邪火殺穀名曰除中如膏之將滅必大明而後滅死在旦夕矣次日果死

瀉治驗

一痘將靨忽作泄瀉口渴飲水小便短少其痘胖壯紅潤此內熱也用五苓散加黃芩芍藥煎調益元散服之而安

溘瀉治驗

一痘起膿成能食一向溘泄未止用錢氏異攻散加木香訶子肉服之而安

渴瀉治驗

一痘成膿面部將靨因渴引飲過多以致自利用白木散服之渴泄俱止而安

瀉虛治驗

一痘成膿少食忽作泄瀉不止瘡變灰白用木香散豆蔻丸服之而安

五虛不治

一滑泄不止食少腹脹足冷痘灰白色脉細無力此犯五虛不治果死

靨時表解裏當和

忽爾通腸洩奈何

不是裏虛元氣脫

必然倒靨毒邪多

痘子初出以來表裏俱病收靨之時表邪已解裏氣

中氣虛泄

當和。大便宜潤。小便宜清。忽爾洞泄。水穀者。此中氣暴虛。不能禁固。水穀或毒氣乘虛入裏。欲作倒靨。並

毒乘虛入裏泄洞主

宜陳氏木香散

二十

異攻散

二十

肉豆蔻丸

四十

主

之利止者佳。利不止者。陽脫而死。

潰瘡最毒。面居先。

陽毒從陽。心火炎。

能食便調。無別苦。

可投良劑。保傷殘。

面瘡潰爛不治二症

痘瘡潰爛。先傷於面者。面乃諸陽之會。痘乃純陽之毒。以類相從。如水就濕。火就燥也。又心之華在面。諸瘡皆屬於心。心火上炎之象。如面瘡已破。腫消。目關

瘡潰腫可治症主方

者。此不着痂。先以乾燥。病為倒靨。死在旦夕。如已破。復灌滿。面成餅。焦裂。濺起膿血。淋漓。食穀則嘔。飲水則噎。咯唾粘涎。語音啞。口中氣臭者。此臟腑敗壞。故諸證盡見也。淹延悶絕而死。如瘡潰腫。飲食無阻。大小便調。更無他苦。如上證者。此則可治。內用十全

大補湯

三十

升陽解毒湯

一百二

相間服之。外用滅

癩救苦散

七十

百花膏

九十

合而敷之。

陰陽界限在人中。

任督分來上下通。

宜向此間漸收靨。

陰陽相濟得和同。

痘瘡先收
壓吉
先收壓凶

人中為任督交會之衝。督乃陽脈自人中而上。任乃陰脈自人中而下。故自準頭至印堂與頰至鳩尾相應。印堂至髮際以上與膝以下相應。痘瘡收靨但觀面上收到之處則知身上收到之處矣。凡痘子自人中上下左右先出先靨者吉。陰陽交合相濟之理也。若自額角先靨者孤陽不生。足下先靨者孤陰不長。皆凶兆也。

蘄水縣柴家垵柴大愚之妻乃金谷山周望峰女也。二十七歲戊戌年出痘甚密。膿成時請予治之。

白口唇兩
傍收起漏
漿吉
自鼻準先
收凶

予見鼻準先乾曰此凶證也。不可治矣。或問此痘將收而謂不治。先生誤耶。予曰起發未透膿漿未熟不當靨也。况痘瘡收靨自有次第。形色亦殊。先自口唇兩傍收起。漏漿堆膿面瘡皆然。自項而下則成疔殼。今痘未熟而靨乃倒陷也。自鼻先收失其序也不漏漿者乾枯也。予不能治遂辭去。後三日而卒。

陰陽相濟得相成
陰寡陽孤勢不行
不信但觀頭與足
痘瘡難靨自分明

頭足後醫
吉

造化之理生於陽者陰成之生於陰者陽成之痘瘡收靨頭自髮際以上陽氣獨盛謂之孤陽足自膝以下陰氣所聚謂之寡陰所以諸瘡皆靨之後此二處難靨乃造化自然之理不可作倒靨論

會因傷犯灌成瘡

待到收時不飲漿

膿汁淋漓多痛楚

急宜治療免殘傷

痘爛不收
痛可治主
方

痘瘡結膿窠之先或會傷犯破損者灌爛成瘡至於收靨此獨不靨膿汁不乾更多痛楚若不急治漸成疔蝕瘡損骨傷筋以致橫天宜內服十全大補湯十三

疔難治

疔可治主
方

外用滅癥散七十和百花膏九十傳之

幾箇頑瘡不肯收

無時痛楚血常流

此成疔蝕難調理

日久堪嗟一命休

痘子已成疔蝕瘡者若在肢節及諸虛怯軟弱血氣俱少之處色青紫黑腫痛潰爛以漸延開血自出者難治若所生之處在於陽分不痛不爛色不變血不出者以綿繭散一百二主之

一向渾身只煖溫

忽加煩熱減精神

乾漿焦靨宜如是

只怕生來內外因

收靨發熱
內外因主
治

痘瘡常宜溫煖，有熱不可盡去。如一向身溫，今反發熱者，俗名乾漿。此亦常候，只怕內傷飲食，外感風寒，以致發熱。又當別論。然病久氣虛，不可輕用汗下。因外傷者，桂枝葛根湯五，加人參。因內傷者，木香大安丸九，主之。並宜用連翹飲。凡痘出太密，身有壯熱，可嫌者，連翹飲聖藥也。八十八

待到渾身膿水乾

紛紛時俗急心生

不知禁忌多翻變

一簣難成九仞山

收靨之時，人心急忽，居處飲食，不知禁忌，以致變生

異證，涓涓皆是也。

○痘靨辨生死訣

一痘靨時，面上遍身臭爛，不可近目，無神采者，死勿治。

一痘靨時，遍身瘙癢，抓破無水，皮捲起如豆殼乾者，決死勿治。

一痘靨時，兩腮乾硬，按之如石者，決死勿治。

一痘靨時，泄瀉不止，遍身潰爛，足冷者，決死勿治。

一痘靨時，瘙癢不止，寒戰咬牙，失聲者，決死勿治。

一痘靨時、嗆水失聲、或乾嘔者、決死勿治、

一痘當靨之時、目閉無神、腹脹足冷、過膝者、決死勿

治

一痘當靨之時、聲啞氣急、痰響小便少、大便頻者、決

死勿治

痘疹世醫心法卷之六 終

痘疹世醫心法卷之七

落痂證治歌括 凡一十一首

瘡痂自脫痘癩明、無凸無凹皮肉平、

容貌不殊原未病、泰來否去一番新、

收靨之後其痂亦先後以漸自脫其癩鮮明光瑩平

整無赤黑無凸凹容顏依舊五官四肢並無傷殘此

大順大吉者人生過此又一番新也

滿面天黥黑黥漆、形容變盡髮毛更、

傍人乍見應難識、恰似重來生一般、

落痂順言

痘疹心法

卷之七

險中得生者

靨後痂落滿面，痂痕或赤或黑，五官廢缺，四肢傷殘，毛髮盡脫，形容大改，此險中得生者。又如再生一般也。

落痂之後痂赤黑，愛養能教痂自滅。

突起還將風熱論，凹陷却因虛裏得。

瘡痂落後其面痂或赤或黑者，用四白滅痂散一百二十

七臨睡以清蜜水調搽面上，至曉以水滌去之，自然

白瑩脫去，更宜愛護，不得早見風日，經年不滅如瘡。

痂突起成凸者，此熱毒未盡，解毒防風湯一百主之。

痂突凸主

痂凹陷主

治

外更用蜆子肉水摩之，如陷下成凹者，此脾胃虛不能長肌肉也。人參白朮散三十加黃耆主之。

靨後痂皮令自脫，日久不脫脾胃弱。

莫教搗搯又傷膚，番覆成瘡膚似剝。

痘瘡收後其痂自脫者佳，不脫以百花膏潤之九十

令其速脫，稍遲則乾硬深入肌肉，經久方脫，遂成痂

痕，然久而不脫者脾胃虛也。人參白朮散三十加黃

耆官桂主之，不可搗搯剝去，若不禁手反傷皮膚，復

灌作瘡，番覆潰爛，一時難愈，其後多成疥癩也。

痂落遲主

痂不脫治
驗

頭足痂不
脫吉

一小兒靨後痂皮不脫問予予曰此脾肺二經不足也蓋肺主皮毛脾主肌肉其氣不足故痂難脫也乃用錢氏異攻散加黃耆桂服之愈

一小兒痘後一身盡靨痂皮盡脫惟頭與足不靨其家甚憂請予治之予曰此常候也何勞吾治蓋天地間物以陽濟陰以陰濟陽陰陽相濟而成造化人之一身諸陽皆聚於頭乃陽中之陽謂之孤陽諸陰皆會於足乃陰中之陰謂之寡陰孤陽不生寡陰不育所以頭瘡不收者孤陽無陰也足瘡

不收者寡陰無陽也久當自痊但遲遲耳不須服藥亦無方也請者喜而退

痂皮不脫日時深

陷入肌膚必作癍

胸背四肢由自可

面顏豈可著癍痕

面上痂不
脫主治

凡瘡痂日久當脫不脫者胸背手足無妨惟面上不脫必成癍陷未脫者以百花膏潤之九十令其易脫脫盡之後癍痕黑黯者以四白滅癍散塗之一百二十七

痂脫癍痕黑黯多

勸君未可許無痂

毒邪歸腎誰知得

只要其人表裏和

癩黑暗歸腎

凡瘡癩頭面渾身並黑暗者未可便說無事猶恐日前未甚作膿收靨太急此倒靨歸腎也但察其表裏如壯熱大渴未除煩悶昏睡少食或大便不通或自利此真倒靨歸腎也若身溫煖爽快食漸加大小便調者此瘡癩本色無慮也

癩吉

氣虛癩白
主治

一小兒痲落後其癩白色或以問予予曰此氣虛也肺為氣之主其色白當用參耆大補之劑否則有變其人曰痘已收完何變之有至一月後大喘而歿

趙曰禹城舍親楊春元令孫痘後遍身痘癩俱白余云癩白氣虛也令服保元湯服至癩紅方止依方服之皆紅

臨胸庠生遲尚友令郎痘後癩紅多白少微癢余立保元湯加白芷防風服二劑癩紅癢止

收靨遲遲不脫癩
只因氣弱神先倦
神昏喜睡此無他
緩治求痊不必嗟

如收靨既遲瘡癩不落昏昏喜睡者此邪氣已退正氣未復脾胃虛弱宜調元湯
十八
加麥門冬合安神

痲不落神昏喜睡主
治

九七十四或只用酸棗仁湯十一百二緩緩調理待氣血平復榮衛和暢而安矣

脫痂胃氣未全舒飲食安能便有餘
若使食多休浪喜胃中邪熱不曾除

食多胃熱之病主治

瘡痂既落中氣暴虛多不能食必藉人參白朮散十二去葛根加陳皮木香以調養之其間或有瘡痂起而能食者是胃中宿有蘊熱故也蓋胃熱則消穀所以能食其人必大便稍秘或大便難當用三黃丸八和之否則恐胃熱不去鬱為口臭齒腐生風之證流

散四肢則發為癰疽腫之毒然有一等脾胃素壯實者平素能食大便亦不至有秘結之患此又不可一槩論也凡痘瘡自成膿後先四五日未大便者惟膽導法為最五十一

痂起渾身一掃空 癩痕凸腫盡成膿

依然箇箇如先樣 形證輕微却不同

癩腫成膿諸症

痘瘡收靨之後痂皮盡脫曾見癩痕凸起復作膿窠依舊結一層痂子者或因收靨太驟毒氣未盡或因誤服溫補之藥多啖肥甘之物飲酒喜食煎炒辛熱

或因出風太早榮衛鬱而不通皆能復成此證亦與前日一般但無苦耳若此者毒邪外散決無留毒之患

面癩腫如梅李治驗

本邑二尹雷省齋次孫出痘落痂後一月有餘面癩凸腫如梅李大請予視之予曰此原日所犯辛熱之毒今始發泄也凡毒自內而外者吉乃用當歸稍赤芍藥防風荆芥連翹牛旁子玄參蟬蛻升麻作散淡竹葉煎湯調服而安

癩肉凸起作痒治驗

一小兒落痂後癩肉凸起且作痒請予予曰此風熱也用人參敗毒散加防風荆芥一服而安後有患此者用荆防敗毒散加人參服之外用水楊湯浴之皆效

痘中忌食薑

一小兒落痂後癩毒不平人問予予曰痘家不可食薑恐靨不齊癩不平也問之果然

手搗癩腫復成瘡治驗

一小兒落痂後癩腫復成瘡久不愈請予治之予曰此痘毒瘡也由犯以手搗搗不得自脫故皮肉受傷而復作瘡也以苦參丸與之而安瘡痂起處落紛紛幾處猶然膿水浸

硬疹畜膿原毒壅 空囊停水裏肌平

痘瘡潰爛不結痂者倒靨也或三五處腫灌潰爛不結痂者疔蝕瘡也若已正靨痂起自腕或面上或手足成片結硬瘡頭雖焦中畜膿漿者此是原出瘡子之初其處太密糊塗成片無分顆粒所以毒壅於裏不能起發作膿結痂也但用滅癩救苦散七十和百花膏九十塗之待膿盡痂起自愈或手足腕膝之間瘡窠連串作大一塊膿化作水停畜於中恰如囊袋皮不破水不去日久只如是者此裏面肌肉已好原

膿水浸主

空囊成水 主治

日瘡皮剩於外也宜用針決去其水自乾脫矣
瘡後心虛氣未平 更宜調護保安寧

皮膚嫩薄風寒襲 腸胃殘傷水穀停

痘新瘡後 不宜濕洗

不宜飲冷 傷飢過飽

瘡痘新瘡之後氣血未復視之未靨尤加調護可也蓋痂皮起落肌肉新嫩不宜澡洗增減衣服則表已虛寒暑之氣易襲也瘡毒內作臟腑俱傷毒雖外散腸胃已弱不宜飲冷傷饑過飽則裏氣虛飲食之物易傷也時俗不知此理謂之已痊再無他變怠玩縱馳致生後災一旦病生悔之晚矣

痘疹世醫心法卷之七終

痘疹世醫心法卷之八

痘後餘毒證治歌括 凡三十六首

痘瘡靨後喜無邪，人漸清寧食漸加。

若比痘中還更苦，莫言無事便矜誇。

或問痘後餘毒可前知乎曰痘未靨時毒氣未除正氣未舒如鱗在湯如蚓在灰之狀痘已靨後毒氣已盡正氣將復如困魚入水囚鳥出籠之狀但察其身無熱口不渴大小便調腹中無痛精神漸壯飲食漸加此真安樂之時豈有餘毒哉若身熱而渴腹痛吐

無餘毒諸候

有餘毒諸候

泄。或小便赤澀。大便堅秘。精神昏憤。四肢倦怠。飲食減少。坐臥不安。此有餘毒伏藏。必生後災。以此決之。可前知也。

痘瘡輕者自無乖。逆重從來有後災。不是毒邪根裏得。或因調治誤中來。

餘毒

凡痘瘡輕者其本疎其毒微其證順自然易靨無餘毒也。重者其本密其毒盛其證險自然難出難靨有餘毒也。逆者或伏或倒靨或倒靨幸脾胃素強調治又早不至大困亦作餘毒。錢氏云其病有三一者疥

治前看表裏虛實

二者癰三者目赤以證求之尚不止此亦有出已盡發已透靨已齊者復作餘毒此由溫補之過飲食之失而得之故治痘後餘毒或補或發散或解利要在分表裏論虛實不可一槩妄投湯劑也。

痘瘡靨後難調理。表裏俱虛勿縱施。此與傷寒復病同。補虛為本而已矣。

調理

痘瘡之後表裏俱虛要避寒暑戒頰洗以養其表節飲食遠房室以養其裏傷寒賦云勞食再復病名內傷言其虛也又云諸食皆復飲酒則甚諸勞皆復御

女必死。言犯其虛者不可治也。如小兒則在父母之調護。大人宜自保而勿失焉。治其病者惟以補虛為本。所因之病以末治之。

古云痘毒只三門

自我推求未足憑

五臟有邪皆有證

各隨形證審來因

痘科云痘後餘毒一者疥二者癰三者目赤夫疥者心病也癰者脾病也目赤者肝病也胎毒之發五臟各有一名如心為斑脾為疹肺為膿泡肝為水泡腎為黑陷是也發熱之初五臟各具一證如呵欠驚悸

毒歸臟腑
症

屬心項急煩悶屬肝咳嗽噴嚏屬肺吐瀉昏睡屬脾耳涼肌涼足涼屬腎是也何以餘毒只心肝脾三臟有之乎况三臟之證又不止於此乎或者舉其重而言之欲人推廣之耳○如毒歸於心則為斑疹為驚悸為癢痛為壯熱為咽乾而渴為汗為丹瘤○毒歸於肝則為悶亂為水泡為腰痛為目病為卵腫為乾嘔為手足拘攣為吐衄為寒戰咬牙○毒歸於肺則為咳為喘為衄血為瘡乾燥皴揭為肩臂痛○毒歸於脾則為吐為泄為腫為脹為腹痛為唇瘡破裂為

舌本強為手足病為不食。○毒歸於腎為黑陷為猝失聲為手足逆冷為咽中乾痛為饑不欲食為多唾。○毒歸於腸胃為泄為利膿血為腸鳴失氣為大便不通。○毒歸於膀胱為小腹滿痛為溺血為遺尿為頭腫痛為目上視已上五臟之證略舉其槩臨病之工不可不審。

不忌口發餘毒

黃州府管糧通判蕭壬峰小姐乙丑冬出痘請全調治原小姐嬌惜太過非雞與煎熬厚味不食而彼處風俗有病者必服附子食雄雞炙關元全請

餘毒發於肝治驗

戒之不聽全嘗告曰不肯慎口他日畜毒作病必廢調理公不肯信自丙寅年後兩目出淚眼弦亦爛全曰此毒發於肝肝火旺也公曰目上下臉屬脾脾有熱乎全曰此因淚出不止浸淫爛潰也乃用瀉青丸方去大黃加柴胡黃芩密蒙花煉蜜為丸服半年後而目不出淚眼弦平復矣丁卯夏又小便如靛水點滴着肉處皆爛成瘡泡全曰此亦肝火也公曰膀胱之熱全曰肝色青乃肝移熱於膀胱也又用瀉青丸去大黃加柴胡木通車前子

小便如靛肝火也

煉蜜為丸服之而安公曰不聽爾言反勞爾力

痘後留邪作腫癰 或為結核論相同

但將毒氣分深淺 莫使餘邪透骨縫

餘毒發癰

此已下二條言癰毒也此由毒氣留藏經絡故於肌肉虛處或關節動搖處紅腫而成癰又或既平之後失於解利餘毒太盛外不得洩於皮膚內不得入於臟腑聚而不去遂為之癰如毒氣淺者止生結核腫毒瘡癤而已甚者至頭項腦脇手足肢節盡掀腫作痛但發一二處或根淺者可治若流注起伏根深蔓

引者小則潰筋脫骨必為殘廢之疾甚則綿延日久而死

發癰不治症

本邑庠生胡近濱長女出痘不甚密亦不十分光壯飽滿與藥治之點滴不入口蓋平生不肯服藥也收靨時一片薄殼逆痘也足膝發癰毒與藥一飲而盡近濱夫婦皆喜予曰勿喜病不可為也近濱問其故予曰脾主味開竅於口經云口和則知五味矣今愛素不肯服藥今肯服藥且盡是知味而脾敗矣况膝臏之處脾實主之脾敗則亦不

能成膿。及請方士蔡谷陽針之。果皆清水。次日卒。
○蘄水縣夏佐南長子。痘後手足發癰。請予視之。見其面色黎黑。精神疲困。飲食且少。予曰。令嗣之痘未得光壯。收靨太急。今發癰毒。乃倒陷。歸腎證也。必不能成膿而死。

痘後發癰 治驗

一小兒痘後發癰。請予治之。予用十全大補湯。加連翹。金銀花。治之。而愈。蓋其癰已潰。故用是方。凡潰癰者。以是治之。未有不愈者。
一小兒痘後發癰。即請予治。予用解毒內托散。調

痘後卵腫 治驗

理而安。

黃岡縣三家店蔡丹泉一子。痘後卵腫。吾男邦正醫治。作厥陰肝經病。是也。丹泉不自安。使人問予。予曰。非癰。乃厥陰肝病。因寄一方。用柴胡湯加青皮。木通。山查肉。調理而安。

看。在。何。經。用。引。經。

腫。時。不。與。潰。時。論。

補。中。托。裏。分。虛。實。

決。毒。排。膿。視。淺。深。

治癰當審 經絡

凡治痘癰。先看。在。何。經。絡。分。氣。血。多。少。用。引。經。藥。如。太。陽。經。羌。活。防。風。陽。明。經。升。麻。白。芷。少。陽。經。柴。胡。少。

治癰未潰主

陰經獨活太陰經防風厥陰經柴胡若初紅腫硬痛者以針刺之口吮去惡血以拔毒膏九十敷貼解毒

內托散一百二十附方 氣實能食大便堅者用排毒散一百

二十 疎利之氣虛食少者用十宣散三十或流氣飲

一百二 毒淺而小者只內服小柴胡加生地黃湯一百

十八 外用神功散或拔毒膏貼之九十此治腫瘍之

九 法也若已成膿而未潰者以鉞針決去其膿勿使內

潰已潰者用十全大補湯主之三十此治潰瘍之法

也○大抵痘毒發癰在手肘腕足膝脰中者多若在

癰發經絡 主治

已潰者主 治

手腕發者屬手太陰肺經在足脰發者屬足太陰脾經並用解毒托裏散主之一百二十二附方

趙曰臨胸庠生馬斯作一小女生痘靨後餘毒在

耳下少陽經生瘡久而不愈余令用柴胡一錢人

參六分黃芩四分半夏四分炙甘草四分黃芪鹽

水拌炒六分白芷四分生地黃八分薑棗煎服對

李醫官重興云若欲生膿去白芷加白朮四分又

於項後髮際處腫此連及太陽經也加羌活川芎

各四分而腫消乃去白芷加白朮金銀花連翹阜

角針遂潰而膿水淋漓不愈又於耳前孔外生一
瘡余令用柴胡一錢人參五分黃芩五分半夏五
分炙甘草五分黃芪鹽水拌一錢生地五分白芷
七分服外用綿繭散敷之耳下瘡痊而耳前瘡亦
愈

趙曰臨胸一小兒痘後餘毒夜間癢甚拆破膿水
淋漓余令內服苦參丸七十外用黃連生者五錢
蛇床子三錢苦參三錢無名異二錢生地三錢大
楓子五箇去殼白芷三錢茨藜炒去刺二錢輕粉

二分連翹二錢為細末香油調拆破搽上即癢止
膿乾而愈

遍身疥癩候何寧

敗面殘形亦可矜

搽搯膚傷為毒淺

薰蒸肉爛受邪深

餘毒發疥
主治

此一條言疥毒也痘後遍身瘡癩如疥如癩膿血浸
淫皮膚潰爛日久不愈此毒氣彌漫散於皮膚宜升
麻葛根湯一防風解毒湯一百苦參丸七十主之若
因搽搯成瘡者只以百花膏九十塗之

疔蝕頑瘡亦可嫌

時時流血不曾乾

毒在脾發
疔蝕瘡主
治

穿皮銷肉成癥陷 腐骨傷筋作天殘

此毒在脾也。痘後疔蝕瘡者，毒壅肌肉，內透筋骨，外連皮膚，時痛出血，日久不痊，亦惡候也。內服十全大補湯，八三十外以綿繭散貼之，一百二十五

毒散皮膚有數般 或為癩疹或成丹

丹瘤凝結從深論 癩疹分踈作淺看

毒在心肺
二經丹瘤
癩疹主治

此毒在心肺二經也。痘後毒氣散於皮膚肌肉者，病有數般，或為癩皮，上起如疔瘡，瘙癢爬搔更多，內服解毒防風湯，一百外以篦衣湯洗之，一百或為疹皮

上如蚊蚤所咬之迹，或如小疥子，即麻子也。升麻葛

根湯，加防風荆芥穗，主之熱甚渴者，與人參白虎

湯，二十相合服之，或為丹瘤紅腫作痛，手不可近，流

移上下過心腎者，即死，宜內服小柴胡，加生地黄湯，

一百二外用蜚針法，吮去惡血自消，一百三或用砭

法，若但紅不腫不痛者，斑也。人參白虎湯，又名化斑

加玄參大青生地黄主之，湯二十四

眼中翳膜忽遮睛 癩澁難開若霧雲

但用湯丸頻解毒 勿輕點洗反傷明

目病毒在肝主治

此下二條言目病毒在肝也。瘡痘毒氣之為目翳也。蓋自臟而達外治之法。但活血解毒而已。活血不致於熱。解毒不致於冷。五臟平和。則翳當自去。不可輕用點藥。反致損睛。宜蟬蛻散九十六四物湯十九加柴胡主之。

暗中強視淚盈腮

略見陽光不敢開

此是羞明差別法

莫將膚翳混同猜

目羞明主治

痘後目閉淚出不敢見明者。此羞明證也。惟於黑暗處則能開。纔見明則陽光燦之。淚自溢出。癢澁難開。

宜洗肝明目散九十五

加蜜蒙花

目中赤者洗肝明目散九十五主之

本邑二尹雷省齋一孫出痘七日倒靨予往視發

出省翁問曰再服何藥予曰痘既發出毒猶太甚欲解其毒中氣素虛恐傷中氣又致倒靨欲補其中恐助毒火又傷其目不如節飲食適寒溫以待自安時萬世喬正與省翁父子厚晝夜公解不出欲進補中藥聞予言而止偶因傷食發熱予不在焉世喬言於眾曰昔欲用藥密齋阻住今病亟矣

妄補致目

畏明不服藥致內障

密齋不得辭其責，省翁父子皆有怪心，乃作參耆溫補之劑服之。韓鳳岐與吾兒邦治任其所為，不敢止也。予聞其事，又往問之，人皆曰：「二公正怪，爾不必往。」予曰：「吾無所失，何怪哉？」徑入問之。予先告曰：「勸勿服藥，恐其傷目，何太求效之速？」省翁曰：「但得生，雖帶疾何妨，蓋謂必不得生也。」予又告曰：「令孫必無事，他日損目，切記吾言。」今果兩目俱盲，省翁父子始悔不信予言，而踈世喬矣。

本學掌教王月山公子痘後兩目畏明，予曰：「肝火

太旺，宜服瀉肝散，加柴胡、蟬蛻、黃芩，初一劑用酒製大黃，公子不喜苦藥，未服果成內障，兩目盲，諸醫不效。

兩胞高腫不流淚治驗

目有白翳不治

本邑徐少柳一子痘後兩目不開，請吾兒邦治醫不效，乃請吾視之。予曰：「兩胞高腫而不流淚，決非痘醫，乃脾經濕熱也。」遂製一方，用蒼朮、童便、浸黃連、酒炒、防風、升麻、生甘草為末，蜜水調服而愈。本邑湖田蕭天秩一子痘後目有白翳，請予視之。予曰：「此痘癍也，治之無功，果盲。」

妄治損目

蘄水縣徐淑道在吾縣出痘不靨先君命全治之許謝數多蕭桂屏欲悔其議再請團風鎮醫李姓者至用陳氏木香散一服予曰誤也必損目矣果損一目

羞明治驗

蘄水縣金谷山周望峰一女出痘後目閉不開是予調治予曰令愛之痘順痘也不失常期有何餘毒必羞明證也乃試之向暗則開兩目不赤向明則閉又不流淚此肝經火邪未去也乃用羌活防風當歸稍川芎柴胡蔓荊子密蒙花生甘草淡竹

頭腫目不開治驗

葉一服而目開遍身痘癩腫凸而起再用四物湯加防風荊芥人參連翹生甘草服之平復本邑多雲山周宅一小兒九歲痘後出外忽頭腫兩目不開請吾妾兄甘大文亦吾所傳者大文問吾求方予教曰此非痘毒乃風熱也口授一方用羌活防風升麻柴胡當歸川芎藁本蔓荊子細辛甘菊花黃芩酒炒往治之而安趙曰臨胸一小兒痘靨未完左眼胞裂一口子出膿浸淫成瘡余口授李醫官重興用十宣散治之

而愈

熱毒乘虛入腹中

大腸乾澀便難通

如逢熱結膀胱裏

洩不來時又病癰

毒在大腸膀胱

此言毒在大腸膀胱也。痘後毒入腹中，熱氣併於小

腸，則小便不通，併於大腸，則大便不通。如前後部俱

不通者，熱勢愈甚，小便不通者，五苓散二十導赤散

三大便秘不通者，三黃丸八四順飲二十三乙承氣

湯三十大小便俱不通者，八正散四十通關散一百

醫後餘毒未盡諸熱

五斟酌用之。凡醫後餘毒未盡，有諸熱證者，並宜大

症宜服方

連翹湯八十多服佳

而今泄利又何如

治法難將一例拘

能食渴多知是熱

脈微食少又為虛

此下皆毒在腸胃證也。痘後泄瀉，其證有二。如能食

而渴，脈盛者，此熱入大腸也。渴者，內熱也。食能多者

邪熱殺穀也。脈盛而數，熱證諦也。宜黃芩湯四十一

加黃連。如食少不渴，脈微小者，此裏氣虛不能禁固

水穀也。宜四君子湯二十加訶子、肉豆蔻，或理中湯

丸加熟附子三十甚者以肉豆蔻丸止之四十

毒在腸胃

熱瀉主治

虛瀉主治

泄利頻頻見膿血

此是大腸多蘊熱

莫將倒陷一般論

只宜解毒不宜澁

熱毒入大腸

痘後便膿血者此熱毒入大腸也宜四物湯

十九加

黃芩黃連枳殼荆芥穗或黃連解毒湯加生地黃

十八

九勿作倒靨及用劫澁藥也

本邑多雲鎮張國重一子痘靨時面瘡潰腫膿水

浸淫泄下膿血後重不食先請醫聞廷南名醫也

作噤口痢治不效請予治之予察其證乃是倒靨

非痢也在痘科中則曰利下膿血痂皮者生水穀

泄膿血治驗

不化者死在傷寒厥陰經病論則曰熱畜於裏當

便膿血勿治利盡膿血自愈予思此疾不死不可

亟治乃買藥製藥故延緩以待之數日後度其膿

血將盡乃用四君子湯加白芍藥枳殼黃連木香

一服而後重除利略止再服而能食三服而痘靨

○趙曰臨胸庠生遲尚友令郎痘後餘毒大便下膿

血余立一方人參白朮白茯苓炙甘草白芍藥枳

殼當歸生地黃連木香各六分服四劑減八分後

一日驚悸余令合牛黃清心丸

三十一

作散服二字

煎燈心湯調下，一服而驚利俱止。

胃家有熱難留食，胃冷無緣納水漿。

若是痘家多屬熱，嘔家聖藥是生薑。

吐毒在胃嘔

此言毒在胃也，胃主納而不出，大小腸主出而不納。

痘後嘔吐者，是餘毒在胃也。然有冷熱二證，如心煩

作渴，食乳甚急，聚滿於胸中，然後吐出，如射其人面

色帶赤，手足心熱，居處喜涼，此熱吐也。如乳食水漿

隨吐，面色青白，手足冷，大小便自利，此冷吐也。熱吐

者，橘皮湯九十四加黃連、竹茹、冷吐者，益黃散五十四痘

熱嘔主治

冷嘔主治

傷食嘔主治

後餘毒多是熱邪，其間冷證亦有一二也。亦有傷食

而嘔者，但聞食臭，即吐不能食，木香大安丸九十一

或養脾丸六十一並用生薑湯下，有飲水多而吐者，必

吐清水，名水逆，五苓散二十八主之。

傷飲嘔主治

一向蒸蒸熱未除，治宜詳審勿差殊。

便難煩渴方為實，清便饑疲本是虛。

此毒在心經也，痘瘡自初以來，一向發熱，至於瘥後

猶不少減者，此有虛實二證，如大便難，小便赤，能食

而煩渴者，此實熱也，以三黃丸八或四順飲二十七

實熱主治

虛熱主治

先解利裏熱後用升麻葛根湯。一加地骨皮解表熱也。蓋升麻葛根湯治瘡疹未發之先已發之後身熱藥也。如大便不秘小便不赤坐立振搖飲食不甚進者此虛熱也。以調元湯十八加知母麥門冬虛甚者加炒乾薑或熟附子少許以調之。

實熱治驗

一小兒痘後發熱大小便難瘡癩帶赤他醫言虛欲用保元湯予曰不可此實熱也。因食辛熱之物得之。果因食雞而得以連翹飲服之愈。

癩癩發熱不治症

一小兒痘後發熱不止食少喜睡請予視之瘡癩

虛熱治驗

黑黯乃知痘毒有陷也。予問此兒痘瘡膿水必清痂皮必薄否其家答曰果然不成膿不結疔但水出皮脫而乾也。予告之曰凡痘初出壯熱昏睡乃常候也。痘既收後則邪氣已盡正氣當復熱漸退食漸加精神漸爽亦常候也。今皆不然吾恐術無用矣。遂辭歸半月後忽昏冒而死。

本邑染匠徐姓者一子痘後發熱諸醫或用小柴胡湯或用竹葉湯或用黃連解毒湯皆不效熱益甚請予治之。予用保元湯加當歸炒黑乾薑只一

服而熱去

遍身青黑色非常

口噤涎潮身反張

手足時時頻瘈瘲

不逢識者少安康

毒在肝經 瘵瘵主治

此毒在肝經也。此中風也。瘡痘方愈。榮衛正弱。不知

避忌。忽遇節令氣交八方不正之氣。乘虛而入。故為

此證。宜消風散一百三十二錢。入蟬蛻末一錢。分為三

服。投生薑薄荷汁及酒。各數點。溫湯浸之。連進二三

服。或作癩疹。或再出膚疹而愈。後以抱龍丸調理。十四

搐搦非時俗曰驚

只因熱毒內歸心

毒在心肝 二經熱盛 生風主治

若由傷食增潮熱

腹滿多煩乃食蒸

此毒在心肝二經也。痘後非時搐搦者。有二證。一則

心熱留而不去。熱盛生風。風火相搏。其人必喉中有

痰。目直上視。面赤引飲。居處喜冷。宜導赤散三十瀉

青丸一百清心瀉肝。後以抱龍丸四十調之。一則病

後多食。胃弱不能勝穀。謂之食蒸。發搐其人必潮熱。

大便酸臭。秘洩不調。或嘔吐腹痛。先以備急丸九丁

香脾積丸三十利之。後用木香大安丸九十錢氏異

攻散四十調理取愈。不如只用抱龍丸四十更佳。

食蒸發搐 主治

手足拘攣不得伸

起居艱苦只呻吟

要知養血真良法

莫誤終身作癱人

毒在肝脾
二經手足
拘攣主治

此毒在肝脾二經也。痘後手足拘攣屈伸不便者，乃血耗氣虛不能榮養於筋，宜十全大補湯三十去地黃、白茯苓、加川續斷，多服乃佳。氣虛者少加川烏炮過，行經不可誤作風治，妄行發散反耗陰血也。

右肩發紅
腫其手不

本邑大尹唐肖峰次公子十二歲，戊辰正月出痘，時肖峰要吾相伴往京，為已多疾也，乃請予四男邦治、八男邦靖、同韓鳳岐醫治。痘靨後右肩發一

痛但軟弱
無力治驗

紅腫非癰也。韓以針刺之，其手不能舉。三月末肖峰自京歸，至上蔡聞之，甚憂，予慰之曰：勿憂，待全到縣必治好也。及至縣察之，其手不痛，但軟弱無力，不能自舉，必用左手托之，乃能舉也。肖峰問是何故，予曰：此肝熱血虛證也。蓋肝主筋，資血以養，寒則奕縮，熱則弛長，奕短為拘，弛長為痿，惟補其氣養其血，則病自痊。乃製一方，用人參、黃耆、當歸、川芎、白芍藥、川續斷、甘草節、白朮、桔梗、木香、薏苡仁、防風為末，山藥作糊為丸，服至半月而安。

終日昏昏似醉人 口中妄語若邪侵

誰知熱入心胞絡 解毒安神泰宇清

熱移入心 包絡主治

此毒在心也痘後昏昧不解識人口中常妄言如邪

祟狀此熱移入心包絡宜導赤散三十五吞安神丸十四

待醒後以調元湯加麥門冬生地黄十八四物湯

十九加石菖蒲木通山梔仁相間服之以抱龍丸十四

調理而安

卒然昏睡不知人 飲食俱忘喚不醒

邪毒從今都解散 精神自此漸和平

痘後虛病 主治

此痘後虛病也痘後卒然喜睡狀如眩暈身無熱口中無妄語其人痘出必重又少食今毒氣已解正氣未復故邪退而喜睡乃否極泰來之象不須妄治遂

巡甦醒矣用抱龍丸四十調理

痘後悶絕 目閉口合 治驗

蘄水縣汪元士之子沙溪之孫也癸丑四月出痘至收靨後忽然悶絕目閉口合一家大哭予曰勿哭吾固知有是病也乃命吾次男邦孝作調元湯加麥門冬濃煎汁斡開口少與嚥之又令煮粥湯與藥相間進之須臾平復如故沙溪曰神哉先生

之術。吾小孫之福也。敢問何以預知有此病。予曰。正氣素弱。邪氣方盛。壯火食氣。氣益弱矣。今邪氣既退。正氣將生。乃否極泰來之兆。所以戒勿擾亂。待其自蘇。時人不知此意。猝見悶絕。便將抱動。呼喚號哭。神散氣散。其不救者多矣。時有二醫在家。一姓周者。江西人。乃曰。向者起病日。犯太乙天符。尚恐有變。予曰。運氣之論。岐黃之秘旨。專論其年。非謂起病日也。傷寒鈴法。以日起病。歸號求方。不惟失軒岐之意。而且亂長沙之法矣。况主客之氣。

勝復之變。一歲之中。難以逆料。豈可以是以料病吉凶也。信如爾言。太乙天符日起病者凶。然則太乙天符年有病者。皆不可治也。一姓向者。麻城人。乃曰。尚有餘毒。予笑曰。取錢氏小兒書來。痘後餘毒有三。一曰疥。二曰癰。三曰目赤。未言有昏瞶也。蓋痘瘡或出不盡。或發不透。或靨不齊。或空殼無水。或清水非膿。此則有餘毒也。今此痘者。起發胖壯。膿水飽滿。有何餘毒哉。

一朝手足冷如冰。

蓋覆重加不得溫。

痘正盛時為逆證

病今瘥後作虛論

厥逆虛症
主治

厥逆者痘疹逆候也若在正盛之時十無一生今病已愈氣血久虛脾胃大困宜有此厥逆也用調元湯十加當歸身熟附子以主之

咳嗽聲多不得安

更兼涕唾盡稠痰

莫拘死局輕調理

好把權宜用散丸

毒在肺諸
咳症主治

此下皆毒在肺證也欬嗽者痘疹常證也有寒有熱有虛有實不可拘泥一定之法如自初出欬嗽到今未愈者此肺中餘邪未盡也宜甘桔湯七合瀉白散

五十加牛旁子馬兜苓主之如欬而熱大便難小便

赤者此熱毒也宜黃芩瀉肺湯五十主之大便潤者

人參白虎湯二十合甘桔湯七主之如欬而大便溏

小便清無大熱渴者此虛也宜人參清膈散主之

一如欬而血出者甘桔湯七加牛旁子軟石膏茅根

汁主之如向不欬今始欬者此風寒外感也麻黃湯

六十主之

黃岡縣陶前墩一子戊辰年出痘將靨時咳嗽喘急吾兒邦正醫用甘桔湯加牛旁子麥門冬服之

火鬱嗽治
驗

未效時吾在府請視之予謂正曰汝用方是此證
肺有火邪火鬱宜發之即於前方去麥門冬加蘇
葉地骨皮服之即效

咳嗽之時兩脇疼

陰陽左右被邪干

不能升降多壅滯

解毒和中病早安

嗽而脇痛
主治

經云左右者陰陽之道路左右兩脇之謂也瘡疹後
欬嗽脇疼由餘毒在中陰陽之氣不能升降也脇居
一身之左右陰陽二氣之所行也脇疼是氣不能升
降之故但解毒毒氣去則真氣行所苦自平宜小柴

胡加枳桔湯主之

一百三十三

未出腹疼斑毒攻

而今毒解已無壅

不因燥屎或傷食

必是中虛要建中

毒在脾諸
腹痛主治

此毒在脾也瘡疹未出而腹痛者乃斑毒內攻也今
毒已解無復壅遏腹中痛者一則因大便未通燥屎
作痛備急丸九主之一則因食過多胃虛不能消穀
腹痛者便秘丁香脾積丸三十便利木香大安丸九
主之但燥屎痛者病在下焦傷食痛者病在上焦
手不可按若原食少又便常潤忽爾作痛此虛寒證

也病在中焦喜用手按摩黃耆建中湯二十主之

餘毒畱居心胃中 膈焦咽燥渴來攻

若是脾虛津液少 自然形證不相同

毒在心胃

此毒在心胃也痘家作渴亦是常事如痘後不宜有

熱渴主治

渴忽然渴欲飲水心胃二經受邪熱故也其人必能
食大便秘小便赤舌燥咽乾宜人參白虎湯二十加

虛渴主治

黃連主之若食少大小便自調雖好飲湯咽舌不燥
此脾胃虛津液不足也宜人參白朮散二十不愈人

參麥門冬散二十加天花粉主之

毒在腎失音二症主治

病後那堪猝失音 語言不出意沉沉

咽傷苦痛痰多結 心熱留邪舌不榮

此毒在腎也痘後失音有二咽痛不能言者此毒氣

結於咽喉之間痰壅作痛而不能言天花散主之一百

三心熱不能言者心中邪熱未徹腎虛不能上接於

陽雖有聲而不能言四物湯九十去川芎加麥門冬白

茯苓主之

趙曰臨胸一小兒痘靨後聲啞余用甘桔湯加牛

旁子山豆根石菖蒲訶子肉各三分水煎服之而

愈

趙曰臨胸庠生劉燦令姪痘後聲啞余用桔梗五分牛旁子玄參麥門冬去心知母各五分石菖蒲七分荆芥穗杏仁各三分訶子肉二分煎一鐘入竹瀝二三茶匙治之而聲清醫官李重興治臨胸馬庠生令郎生痘喉乾聲啞用清肺散麻黃一錢五分知母荆芥天花粉一錢麥冬桔梗二錢訶子菖蒲八分煎一鐘入竹瀝治之而愈

正氣將回食漸加 緣何惡食却堪誅

毒在脾經
惡食二症
主治

不因食壅脾重困 或是中虛病未瘥

此下毒在脾經也痘後邪氣盡退正氣將復脾胃略綠宜漸能食也若原不食今因喜食太過或原能食今又驟加以致惡食不食者此皆內傷有餘證也宜木香大安丸九十主之如向未食今猶不喜食者此脾胃中氣不足宜人參白朮散二十去葛根加陳皮木香研末取二兩另用糯米二兩菜豆二兩各炒研末相和棗子湯調服稍能食更兼進養脾丸一百六抱龍丸四十

寒熱往來形似瘧、不拘早晚如期作、

只因調護少疎違、故惹風寒相擊搏、

寒熱如瘧 主治

痘後忽發寒熱如瘧狀、至後如期即發者、此脾虛氣

弱失於將息、重感風寒、宜先以柴葛桂枝湯八十發

去新受表邪、後以調元湯十加當歸、陳皮、白朮調之、

面目虛浮忽收形、腹中脹滿喘聲頻、

邪風入肺疎通去、宿垢傷脾解利行、

毒在脾肺 二經面目 虛浮身腫 主治

此毒在脾肺二經也、痘後面目虛浮、或久則一身皆

腫者、此表氣不足、出風太早、風邪乘虛而入、其治在

肺、宜五皮湯一百三十四先加桂枝微汗之後、只服本方

若遍身皆腫、以胃苓湯一百三十六合五皮湯一百三十四

主之、○痘後腹虛腫脹滿、或氣喘粗者、此有宿垢在

裏、不問餘毒、食積畜水、並宜先利之、宜塌氣丸一百三十

五利後、以胃苓湯一百三十六去甘草、加人參、黃耆、大腹

皮調之、其治在脾、如因新食作脹不腫者、只木香大

安丸九十

一小兒因痘後洗浴、面目一身盡腫、請予治之、予

曰、此水氣也、用四君子湯以補脾去濕、加黃耆以

腹脹喘粗 主治

作脹不腫 主治

痘後洗浴 面目身腫 治驗

實表防風以勝肌表之濕麻黃以逐皮間之水一服而腫減後以錢氏異攻散加猪苓澤瀉調理而安

熱熱渾身汗未休 膚濡髮潤亦堪憂

衛中氣弱榮中熱 若到亡陽治不瘳

汗症主治

此毒在心也痘後自汗盜汗皆衛氣弱榮血熱肌肉虛也宜調元湯八十當歸六黃湯六十相間並調敗蒲散七十服之如汗出盛再用溫粉撲之九十若渾身如水髮潤者或汗出如珠者皆亡陽證不治

毒在心肝 二經失血 諸症主治

血在身中怕妄行 火邪迫血血離經

鼻中衄出堪調理 便溺中來禍匪輕

此毒在心肝二經也痘後失血證乃餘毒熱邪迫血

妄行也自鼻出者玄參地黃湯主之六十外用梔子

炒焦黑研末吹之自溺出者八正散四十主之自大

便出者桃仁承氣湯二十主之此與上自汗證同為

熱也上是熱在衛故汗出此是熱在榮故血出二證

大便秘者並與四順清涼散二十主之

蛇動如從吐利中 必然腸胃熱邪冲

毒在肝

吐蛇利蛇
聞食即吐
蛇主治

若聞食臭蟲纔出

此證虛寒勿妄攻

此毒在肝也痘後或吐蛇或利下蛇者皆熱毒入裏

也熱在胃則吐蛇熱在腸則利下蛇利者黃芩湯四

一加桃仁艾葉吐者黃芩半夏湯四加烏梅川椒

若不吐利但聞食即吐蛇者此胃久虛蟲無所食故

聞食臭即吐食已易饑宜理中湯九加烏梅肉

黃連川椒主之

狐惑之證聲啞啞

唇口生瘡誠可訝

齧根潰爛疔蝕瘡

息臭血出名走馬

毒在腎

狐惑主治

此毒在腎也痘後吐利蛔出者此蟲為熱所蒸而出

為蛔厥若不吐利內蝕臟腑者為狐惑狐惑之證其

人好睡默默不欲食上唇有瘡蟲蝕其脰下唇有瘡

蟲蝕其臑其聲啞啞上下不定故名狐惑也此候最

惡麻疹後尤多化蠶九主之如大便結者以

桃仁承氣湯一百加槐子利之或只牙齒齧肉潰爛

者此痘疔脫去痰水浸漬為疔蝕瘡用綿繭散一百

傳之若氣臭血出者又名走馬疔瘡內以黃連解

毒湯八加雄黃為丸竹葉湯下外以馬鳴散傳之

牙疳主治

走馬牙疳
主治

口舌生瘡 主治

一百三十八

或口舌生瘡者並宜洗心散

一百三十七

以上諸

證大便秘者並用四順飲利之

二十

病後宜行解利良

勿令熱毒得為殃

若逢餘毒為諸證

緩藥安能得早康

瘡疹後須當解利勿使餘毒或在表或在裏變生諸

證也解利之劑如三黃丸

八

四順飲

二十

之類若失

於解利致生諸證須當用切中病源之藥以急治之

不可緩治令病勢滋蔓反害人也今人不能究其病

因一槩用不急之藥如四君子之類其意但欲逃差

謬耳何常實能究其致病之由而藥之耶急治之中

惟在識其虛實苟稟受既實榮衛充壯病後有熱者

即與解利緩治不可也所稟怯弱病後榮衛大虛坐

立振搖飲食少者却宜和緩之藥以扶持之候其飲

食如故榮衛既充然後微微解利未為之晚或至虛

之人不必解利可也

能醫惡痘是良工

善痘何勞爾費功

錯認石頭將作虎

盜名欺世立家風

此嘆世之業醫者不能治其惡痘而治其善痘者不

難於治，可以盜名欺世也。

出痘之家氣要清，不宜怪異及虛驚。

若然乍見成凶兆，枉請師巫禱鬼神。

出痘家不宜有怪異虛驚之兆

禎祥者福之基，妖孽者禍之萌。出痘之家最宜內外肅靜，大吉之兆也。若有鴉鳴、鼠鬧、虛響、火光、蝙蝠入室、葱蒜撲人、夜生怪夢、病見死人，是皆不祥之兆也。苟非積善之家，方興之世，鮮能免其禍者矣。

胡松山一子五歲出痘，其母黃氏偃抱半夜後不知在地下睡，又蕭楚梧一子四歲出痘，日中時忽

聞一陣蒜氣過，胡三溪一子出痘，有鴉日日聒噪，胡淑卿一子出痘，近晚時樓上忽一聲響，如棹倒之狀，視之却無，王來棲一子出痘，有蝙蝠飛入房中，後皆不吉。

痘疹世醫心法卷之八終

痘疹世醫心法卷之九

疹毒證治歌括

凡二十六首

疹為胎毒發於心

肺與相連熱毒侵

欬嗽鼻中清涕出

且觀雙目淚盈盈

痘疹皆胎毒所發，毒者火也，故痘子大而掀腫者，少陽三焦火也，陽道常饒，故大而腫；疹子小而碎密者，少陰心火也，陰道常乏，故小而密。三焦水穀之道路，脾胃主納水穀，治痘專以脾胃為主，心肺屬陽而位乎上，心火旺則肺受之，治疹專以肺為主，觀其欬嗽。

者。火炎則肺葉焦舉也。鼻流清涕者。鼻為肺之竅。以火鑠金而液自流也。目中淚出者。肺熱則移於肝。肝之竅在目也。或手搯眉目唇鼻及面者。肺熱證也。

凡遇冬溫最不祥。民多疫癘發瘡瘍。

或逢斑疹相傳候。可用湯丸預解良。

預解痘疹主治

春溫夏暑秋清冬寒。此四時之正氣也。冬應寒而反溫。陽氣暴洩。火令早行人感之者。至於來春必發瘡疥。未出痘疹者必感而出。雖曰胎毒。未有不由天行者。故一時傳染大小相似。但見疹痘之出。宜先服消

毒保嬰丹十一代天宣化丸十二以預解之可使毒徹不為已甚也。

斑疹須明歲氣先。勿輕汗下作傷寒。

察人虛實施方法。莫犯天和損壽元。

治疹初時宜升麻葛根湯

瘡疹之證其初發熱與傷寒相似。但疹子則面頰赤。欬嗽噴嚏鼻流清涕。目中淚出。呵欠喜睡。或吐瀉。或手搯眉目鼻面。宜用升麻葛根湯。不可作傷寒妄用汗下也。汗之則增其熱。為衄。為欬。血為口瘡。咽痛。為目赤痛。為煩躁。為大小便不通。下之則虛其裏。為

傷寒傷風 俱宜惺惺散

傷食發熱 備急丸

治驚熱

滑泄為滯下經曰必先歲氣毋伐天和言不可妄汗下也如手足稍微冷惡寒而無汗面色青慘而不舒左額有青紋者傷寒之熱也手足稍微溫發熱有汗面赤而光者傷風之熱也並宜惺惺散一百一十四發散之目胞腫而右頰有青筋發熱而頭額腹肚最甚或兼嘔吐腹疼者傷食之熱也備急丸下之九面色青紅額正中有紋手掌心有汗時作驚惕手絡脈微動而發熱者此驚熱也瀉青丸一百一十牛黃清心丸六十三主之身熱而倍能食唇紅頰赤大小便秘脇下汗者

治風熱

此風熱也宣風散九十二主之已上諸熱久而不去內外感發則所蘊瘡疹之毒亦能乘間而出矣

疹喜清涼痘喜溫

能知疹痘不同倫

疹苗痘實無人解

謹始慮終用意斟

疹宜發透

疹喜清涼痘喜溫煖此法人皆知之然疹子初出亦須和煖則易出所以發苗之初只要發出得盡則毒便解非若痘必苗而秀秀而實而後毒解也痘子成實之時若大溫熱則反潰爛不收是痘之後亦喜清涼也故治痘疹者無過熱無過寒溫涼適宜陰陽自

和是為得之

趙曰臨胸一小兒患疹發未透余用荆防敗毒散人參羌活獨活柴胡生甘草桔梗川芎白茯苓枳殼前胡荆芥穗防風各五分薄荷葉五片治之疹發透而愈

疹毒從來解在初

出形毒解却無憂

腹中脹痛邪猶伏

喘促昏沉命必殞

斟酌寒熱用藥

疹子只怕不能得出若出盡則便毒解故治疹子者發熱之時當察時令寒暄以藥發之如時太寒以桂

枝葛根湯發之

五

太熱以升麻葛根湯

一

合人參白

虎湯

四

發之不寒不熱以荆防敗毒散

七十

發之

如兼疫癘之氣以人參敗毒散

二

發之如盡一劑

不出再作本湯發之外用胡荽酒

七十

以葶麻蘆酒

遍身戛之務令亟出如三四作更不出加腹中脹痛

氣上喘促昏悶譫妄者必死證也

本邑胡道松遺腹子也年四歲六月間病疹先請

醫甘大文治三日疹不出煩躁轉甚乃請予文又

作荆防敗毒散予止之曰此皆發散之藥無解毒

治天大熱疹不出法

之用。况天大熱。又無時令之藥。一二味在內。則陽愈勝。陰愈虧。陰陽不和。此疹子所以不出也。吾命大文作東垣涼膈散。加玄參升麻。一服疹出。三日而安。

過期不出。勢淹延。

毒伏身中。出見難。

急用透肌休息玩。

豈堪臟腑受熬煎。

疹久不出
主治

發熱六七日已後。明是疹子。却不見出。此皮膚堅厚。腠理閉密。又或為風寒襲之。曾有吐利。乃伏也。急用托裏發表之劑。麻黃湯六十去杏仁。加蟬蛻升麻。外

大便秘主
治

用胡荽酒七十散麻刮之。如一向未更衣者。毒甚於裏。伏而不出。河間涼膈散。加牛旁子一百四十七主之。發之解之。再不出者。死證也。

外涼內熱
疹不出治
驗

吾妾兄甘大文嘗從吾學醫。其術頗行。而未能精。長男發熱。予見之曰。疹也。三日不出身涼。神倦坐臥不安。予謂大文曰。汝子疹毒不出。外雖涼而內則熱。毒火內伏。故令煩而坐臥不安也。若不急治。此子難保。文乃泣而求醫。予曰。何不自治。必要我也。乃用葛根湯。加麻黃石膏。以發之。一服疹子盡

疹色白治
驗

出白色不紅。予曰：此血虛也。用四物湯加防風，只一劑而盡變紅也。予笑曰：爾若愛人之子，亦如愛已之子，恐其誤也。必用吾醫治已之子，亦如治人之子，恐其遲也。而自為之，斯善矣。

蒸蒸發熱，欬聲頻，目脹面浮，氣上行。

坐臥不安，痰唾少，肺焦葉舉，熱邪蒸。

肺葉焦嗽，不已喘面浮，目胞腫，時臥時起，主治。

疹子初發熱時，未見出現，欬百十聲，不已，上氣喘，氣面浮，目胞腫，時臥時起，此毒火內蒸，肺葉焦舉，宜甘桔湯。七合人參白虎湯。二十去人參，加牛旁子，薄。

荷葉主之

火熱薰蒸，汗潤身。

毒邪併迫，血違經。

汗多衛表邪從散。

血去榮中毒少輕。

疹子發熱，或自汗出，或鼻衄者，不須止之，亦發散之。

義故汗者，毒從汗散，衄者，毒從衄解，但不可太過，如

汗太多，人參白虎湯。二十合黃連解毒湯。八十主之。

衄太多，玄參地黃湯。六十主之。

發熱之時吐利并，任他所出，不須驚。

胎胞畜毒從今解，腸胃停污自此清。

汗多衄多，當止主治。

吐利裏急
後重主治

疹子發熱吐利純是熱證不可作寒論乃火邪內迫
上焦多吐下焦多利中焦吐利並多自利宜黃芩湯
四吐利宜黃芩加半夏湯
四十一自利裏急後重者宜
黃連解毒湯九八十合天水散九十九主之

毒火薰蒸氣上炎 咽喉自此正煩疼

從來痘疹多咽痛 莫作尋常喉痺看

痘疹咽痛亦是常候乃毒火上薰而痛也勿作喉痺
同論妄用針刺喉痺內作癰腫故宜針決去惡血痘
疹只是咽乾作痛宜甘桔湯七加牛旁子或射干鼠

粘子湯六細細嚙之

疹毒如焚引火饒 炎邪未許一杯澆

咽喉乾燥心家熱 津液枯虛胃腕焦

疹子渴喜飲水純是火邪肺焦胃乾心火內亢故也

初發熱渴者升麻葛根湯一加天花粉麥門冬渴甚

者人參白虎湯四二十合黃連解毒湯九八十主之

一齊湧出莫驚惶 頃刻渾身朱錦裝

似痘出時隨又沒 如斑紅處却成瘡

痘瘡貴三四次出謂出勻麻瘡貴一齊湧出謂出盡

斑疹辨

渴主治

麻子只要得出便輕減以火照之遍身如塗朱之狀

此將出之兆出形細密與痘瘡密者相似但疹子隨

隨沒非若痘子之以漸長大也出形鮮紅與傷寒發斑相似但疹子粒粒成疹非若斑之皮紅成片如蚊蚤之迹也

痘瘡赤艷癢來攻 疹子紅鮮毒得鬆

白疹血虛猶可療 黑斑候惡莫相逢

疹痘之色不可同倫大抵痘子怕太紅皮嫩易破必

生瘙癢疹子喜通紅疹發於心紅者火之正色也若

疹色淡白者心血不足養血化斑湯主之一百色大

紅酸或微紫者血熱也或出太甚者並宜大青湯百一

疹色紅色
白色紫主
治

四十主之黑者死證也

疹家出没合陰陽 出以溫和沒以涼

連出不收陽氣盛 遲遲間出是陰強

疹子出没常以六時為準假如子後出午時即收午

後出者子時即收乃陽生陰成陰生陽成造化自然

之數也凡此旋出旋收者輕若一出連綿三四日不

收者乃陽毒太甚宜大青湯一百四十一解之逡巡不出

者乃風寒外束皮膚閉密也宜荆防敗毒散七十主之

疹出渾身似火燒 毒邪壅甚急難消

疹出不收
主治

疹不出主
治

解肌只許皮膚煖 救裏宜令便溺調

疹出身劫 主治

瘡疹非熱不出疹子欲出則遍身發熱或煩躁或頭眩或身拘急及既出則身便涼諸病悉解此一層疹子隨收矣如疹子既出熱甚不減此毒壅遏宜大青

便澁主治

湯一百四解其表便澁者以黃連解毒湯八十九合白

大便不通 主治

虎湯二十四或大連翹湯八十八解其裏大便不通者河間涼膈散一百四十七加牛旁子

疹瘡出盡得安寧 邪未盡時氣未平 拂拂熱煩邪尚熾 頻頻嘔洩毒猶蒸

出未盡煩 熱嘔洩主 治

凡疹子只要出得盡則毒邪解散正氣和平如拂拂發熱煩悶不寧如蛇在灰如蚓在塵之狀或嘔吐或注洩此毒邪壅遏尚未出盡煩熱者黃連解毒湯八十九並外用胡荽酒七十四以苧麻蘸酒遍身戛之待疹子出盡則煩熱自去嘔洩自止矣

疹毒餘邪最作殃 幾經惡候致張皇

時行癘氣傳相似 疫鬼勾冤赴北邙

疹子欲出未出之時宜早發散以解其毒則無餘災

疹貴早發 散

若不預解使之盡出以致毒畜於中或為壯熱日久
枯瘁或成驚癇或為泄痢或欬血喘促或作疔腫而
成此雖一時戾氣之染未有不由於人事之未盡者
疹後流連熱不除 蒸蒸烙手髮毛枯

肉消骨立成疔瘦 得遇良工病可甦

疹後熱甚 羸瘦主治

疹子收後身有微熱者此虛熱也不須施治待氣血
和暢自然退去若熱太甚或日久不減以柴胡麥門
冬散五十七甚則以黃連解毒湯八十九合人參白虎湯
四十二與前方相間服之如髮枯毛豎肉消骨立漸漸

羸瘦者柴胡四物湯一百四十三主之

發熱無休神漸昏 忽然瘈瘲事堪驚

莫將風癇同調治 小便宜多患早寧

疹後瘈瘲 主治

疹後熱不除忽作搐者不可與急驚風同論用導赤

散三十五加人參麥門冬送服安神丸四十七小便清者

可治短少者不可治宜服抱龍丸四十四

疹毒流殃走馬瘡 牙齦潰爛食難嘗

唇瘡聲啞成狐惑 漏頰穿喉旦夕亡

凡疹後牙根黑爛肉腐血出臭息冲人者曰走馬疔

疹後走馬 疔主治

狐惑主治

馬鳴散一百三十八主之。若面頰浮腫，環口青黑，頰漏齒脫，唇崩鼻壞者，死證也。如唇口多瘡，其聲啞啞者，曰狐惑。以化蠶丸一百三十九主之。更煩躁昏悶，失聲者，死證也。

疹毒漸成，休息痢。

晝夜不停，多窘急。

勿輕劫瀉，圖霸功。

切忌噤口，成惡疾。

疹後痢主治

疹後洩利，日久不已者，曰休息痢。不可妄施瀉劑，以成霸功。宜黃芩湯四十一合天水散九十四與香橘丸五十五相間治之。若嘔吐不能食者，名噤口，更腸滑不止，或

利下鮮血治驗

下鮮血，或如塵水者，皆死證也。

隆慶已巳，予在鄖陽，有楊舉人一子，病疹後利，下鮮血。請予求方，予口授一方，用當歸、稍生、地黃、白芍藥、條芩、炒黃連、炒人參、生甘草、枳殼、烏梅肉，調理而安。時府中出疹，但病利血者，楊舉人授以其方，與之皆效。

疹後連絲上氣欬。

發作百聲，終不歇。

胸高肩息，目虛浮。

擺手搖頭，泉下客。

疹後嗽主治

疹子收後微欬者，此肺氣未平也。不須調治。若欬轉

甚喘氣逆氣發則連綿不已者此肺中伏火金虛葉
 焦故欬也宜人參清膈散六十一主之身熱者麥冬清
 肺湯一百四十四主之若欬久不止面浮目胞腫胸高而
 喘息則聳肩血自口鼻出面色青或赤鼻燥昏悶搖
 頭擺手者皆死證也

疹後咳嗽
失聲治驗

隆慶戊辰予在黃州府有周小川族中一小兒病
 疹後咳嗽失聲託小川請予求方予授一方以甘
 桔湯加炒牛旁子炒枯芩天花粉作散薄荷葉湯
 調并煎一沸果安

禁忌四十
九日

疹家禁忌法須防
 鹽醋雞魚不可嘗
 欲莫從心終是福
 物多爽口定為殃
 疹家通禁雞魚炙煨鹽醋之類直過七七之後方可
 食之惟宜食淡不可縱口致生他疾也

瘡疹收完幸平復
 飲食如常無艱
 心腹絞痛忽傾亡
 還是氣虛中惡毒

曾見痘疹收後動止出入飲食如常忽然心腹絞痛
 而死者還是元氣怯弱乘以疫癘之氣正不能勝邪
 邪伏於中外苦無病內已虧損故一中而死謂之中惡

疹後中惡

嬰稚初離胎殼中

遍身斑駁似珠紅

胎中熱毒皮中現

莫作時行斑疹同

月間出疹

凡小兒初生未滿月者遍身紅點俗呼奶麻者是也

此由胎中受熱故生下發見於皮膚不可作時行疹

子論妄用湯劑蓋臙臙嬌脆氣血怯弱不能勝湯丸

也宜用遡源解毒湯一百八與乳母服之

發熱蒸蒸便已鞭

皮紅似錦是各斑

莫將疹毒雷同論

笑煞時人醜類看

便秘發斑
主治

凡天行若病大便鞭結熱留胃中故發斑不可以疹

子同治妄用發表之劑反增危劇宜白虎湯二一四

去人參加大青玄參生地黃主之大便秘者以三黃

丸八微利之

痘疹世醫心法卷之九終

痘疹世醫心法卷之十

婦人瘡疹證治歌括凡一十一首

婦人瘡疹最難醫，陰質從來血已虧。

待得疹瘡將發日，只愁天癸又當期。

正理論云：嬰兒女子，益以滋甚，以女人陰質血常不足也。痘瘡始終以氣血為主，一或不足，則變生焉。故女子十四已後，有出瘡疹者，常恐天癸之行，血走氣虛而成陷伏也。

出疹怕天癸行

發熱經行非正時，火邪迫血血奔馳。

急須涼血停為美 莫待中虛悔却遲

痘疹發熱 經水妄行 主治

痘疹發熱經水忽行却非天癸之期此毒火內蘊擾

亂血海迫經妄行月事不以時下以玄參地黃湯六

五或四物湯九合黃連解毒湯八以涼血為主必

欲其止如久不止中氣虛弱致生陷伏者有之

發熱期逢經水行 毒邪得解免煩蒸

過期不止須當慮 補氣溫經令出勻

發熱之時經水適來如期此積毒得去毒亦輕解不

須治之若過四五日猶不止者此熱邪乘血室之虛

疹出經行 過期不止 主治

迫血妄行宜先服小柴胡加生地黃湯一百二以清
血室之熱後用十全大補湯八以補氣血之虛令
其出勻易發易靨也

發熱適逢經水斷 血室空虛防他變

若然謔妄神不清 熱入血宮治勿緩

發熱之時經水適斷宜早服柴胡四物湯一百四加

桂枝以防血室空虛毒邪乘虛而入致生他疾也若

已增寒壯熱神識不清妄誕見聞言語錯亂此為熱

入血室血室者衝脉是也肝主之肝藏血肝為血海

發熱經水 適斷主治

謔妄神不 清主治

天癸之後血室既空熱乘而入宜四物湯十九合導

赤散三十加麥門冬與安神丸四十相間服之

女子居經日已賒 豈堪瘡疹病來加

却愁血海停滯垢 更怕胞門伏毒邪

女子經閉謂之居經滿而不瀉病在心脾經云二陽

之病發心脾女子不月瘡疹之毒屬於心又以脾為

主心脾先病血室不行衝任之間已多積垢一旦瘡

疹之火鬱於命門胞戶之中當出不出毒邪留伏致

生乖戾者有之故發熱之初即當滌除停垢桃仁承

居經發熱
主治

氣湯一百二十主之後以四物湯十九合勻氣散三十
加紅花木通治之

崩漏無時血已枯 瀉而不滿臟中虛

豈堪當此天行病 濟弱扶危救幻軀

女子一向崩漏未止氣血已虛若當天行瘡疹必不

能任其毒惟宜大補氣血為主十全大補湯三十八

瘡出灰白平陷難發難壓者更加熟附子一二片

起發泡漿忽動經 血虛氣弱事堪驚

食多氣壯無他慮 不爾須防陷伏臨

崩漏發疹
主治

痘起發泡
漿忽經行
主治

痘子出現已後最宜表裏俱實飲食能多若當起發
泡漿之時天癸忽動人但知恐被穢氣觸動正氣不
知自身之血不足為厭但血去而氣亦虛毒邪乘虛
陷入於裏惟元氣素壯又能食者必無是變如氣虛
食少之人未有不戢陷伏者宜十全大補湯三十八
主之虛甚加熟附子

經行暴暗猝無音

血去津枯舌不榮

養血通心言語出

一朝聲價重千金

生痘經行
失音主治

女子種痘經水忽行暴暗不能言語者心主血舌乃

心之苗血去則心虛心虛則少陰之脉不能上榮於
舌故猝失音不語也先以當歸養心湯一百四十五養心
血利心竅待其能言以十全大補湯三十八調之

月事如行變壞瘡

內虛陷伏已垂常

藥靈中病終須吉

證逆違師倏忽亡

經水痘不
起發光壯
飽滿主治

月事大行其瘡不起發不光壯不飽滿不紅活頂平
陷色灰白或青乾黑陷者此裏虛之候瘡復陷入也
宜十全大補湯三十八奪命丹十七相間服之其瘡
胖脹紅綻或瘡空中再出一番者大吉之兆若加腹

脹喘促譫妄悶亂寒顫咬牙手足厥逆者必死也

妊娠瘡疹治應難 惟有安胎法最先

不可令胎輕觸動 胎元觸動命將殘

孕婦出痘 主治 孕婦出痘 始終以安胎為主不可犯動其胎其初發

熱以參蘇飲 三發之瘡出現後多服安胎飲 一百四十六

為佳滑者人參白朮散 二十泄者黃芩湯 四十合四

君子湯 二加訶子色灰白起發收較遲者十全大補

湯 三十去桂

本邑庠生程文達丙戌年與吾同案補廩早卒止

孕痘生治

孕痘誤治之害

有一女與江天川弟大中作親年二十出痘且有

娠五月矣請予治之診其脉男胎也惟以清熱解

毒和中安胎為主乃用黃芩白朮為君人參生苁

草當歸身生地黃白芍藥紫蘇葉佐之一日一服

自初出以致成漿無他苦也予聞家中被盜而歸

適有蘄水俗醫郭姓者至程咸器而使之進藥一

服而胎墮果男胎也函請予到痘變灰白平塌成

倒陷裏虛故也詢其所用之方乃獨聖散予曰噫

穿山甲麝香皆墮胎藥胎去氣血益虛瘡毒內陷

不可救也遂離歸三日後卒

瘡正甚時臨正產 幾人束手功莫展

滌除惡露相時行 補益元神休息憚

痘甚時忽
正產主治

孕婦出痘正當甚時忽臨正產孱者只以大補氣血

為主十全大補湯三十若腹中微痛此惡露未盡也

宜去之四物湯九十用熟地黄去芍藥加乾姜桂心木

香黑豆

產後如逢出疹瘡 此時胎去免憂惶

只憑補益收功效 莫犯寒涼生氣傷

產後出痘
疹主治

婦人產後出痘疹者只以大補氣血為主十全大補

湯三十白芍藥用桂酒炒用不可妄用寒涼恐損發

生之氣

痘疹心法卷之十終

痘疹世醫心法卷之十一

古今經驗諸方

一升麻葛根湯解發痘疹之良方

葛根 升麻 白芍藥 甘草 各等分

右剉細水一盞煎七分去滓溫服無時

二人參敗毒散解疫癘發痘疹之良方又主腰痛四時通用

羌活 獨活 前胡 柴胡 川芎 枳殼
白茯苓 桔梗 人參 各等分 甘草 減半

右剉細加生姜三片水一盞半煎至一盞去滓

濕服無時一方加薄荷少許

附方柴葛敗毒散疑似傷寒以此解發

柴胡 葛根 人參 羌活 防風 荆芥

桔梗 甘草 紫蘇葉

右生姜三片水煎服

附方香蘇敗毒散疑似傷食以此解發

香附子 紫蘇葉 蒼朮 厚朴 青皮

山查肉 甘草

右生姜一片水煎服

附方升陽散火湯

升麻 葛根 獨活 羌活 防風 柴胡

人參 甘草 赤芍

右水煎服

三參蘇飲解發痘瘡之良方

人參三分 紫蘇葉 桔梗 乾葛 前胡各四分

陳皮 茯苓各五分 枳殼三分 半夏二分 木香一分

炙甘草

右細剉加生姜三片水一盞煎七分去渣溫服
無時

四雙解散即防風通聖散益元散二方也痘瘡表裏
俱實非此不解

防風 川芎 當歸 白芍藥 大黃 薄荷葉

連翹各五分 石膏 桔梗 黃芩各八分 白朮

桂枝 荆芥穗各二分 滑石二錢四分 甘草一錢

右細剉加生姜三片水二盞煎至一盞去渣溫
服無時

五桂枝葛根湯

葛根 桂枝 赤芍藥 升麻 防風

甘草各一錢

右剉細加生姜三片淡豆豉一錢水一盞煎至
七分去渣溫服無時

六連翹升麻湯

連翹一錢 升麻 葛根 桔梗 甘草各七分

白芍藥五分 薄荷葉少許 牛蒡子一錢 木通八分

右剉細加淡竹葉燈心水一盞半煎一盞去渣

溫服無時

【七】甘桔湯解咽喉之良方

甘草 二錢 桔梗 一錢

右剉細水一盞煎七分去渣食後溫服

附方甘桔清金散治肺熱聲不清響者

桔梗 一兩 甘草 五錢 牛旁子 炒七錢 連翹 去心五錢

訶子肉 三錢

右共為細末每服一錢薄荷葉少許同煎服

【八】三黃丸解毒裏實者可用

黃芩 五錢 黃連 各二錢 大黃 半

右為細末雪水搗丸菴豆大朱砂為衣每服五
七丸食前燈心湯下

九備急丸

木香 二錢 大黃 半 牽牛末 各五錢

右為細末神麩糊丸菴豆大每服五七丸食前
山查煎湯下

【十】羌活湯解發痘瘡兼治肝熱

羌活 川芎 防風 山梔子 龍膽草

當歸 各等分 甘草 減半

右剉細加薄荷葉少許淡竹葉水一盞煎至七分去渣溫服無時

十一 消毒保嬰丹

纏豆藤 或黃豆或菜豆梗上纏遶細紅絲者是於八月間生炆日採之陰乾聽用一兩五錢
黑大豆 三十粒 赤小豆 七十粒 新升麻 七錢半

山查肉 一兩 荆芥 連穗五錢 防風 去芦五錢

生地黄 酒浸焙一兩 川獨活 五錢 甘草 生五錢

當歸 酒洗五錢 赤芍藥 七錢半 黃連 去枝梗五錢

桔梗 五錢 辰砂 別研水飛一兩 牛旁子 炒一兩

老絲瓜 隔年經霜者二箇取連藤蒂五寸燒存性

右一十七味各研細末和勻用淨沙糖拌丸如

李核大每服一丸濃煎甘草湯化下○其藥味

味預備須待春分秋分或正月十五日七月十

五日十月十五日洒掃靜室至誠脩合忌婦人

帶孝服人猶犬見之合畢焚香叩齒日出時望

東吸氣一口吹布藥上向太陽密呪曰 神仙

真藥 體合自然嬰兒吞服 天地齊年

吾今奉 太上老君急急如律令勅一氣七遍

十二代天宣化丸 卽韓氏醫通五瘟卅也

甘草 甲巳年 爲君土 黃芩 乙庚年 爲君金 黃蘗 丙辛年 爲君水

山梔 丁壬年 爲君木 黃連 戊癸年 爲君火 連翹 佐

山豆根 佐 牛旁子 佐

先視其年所屬者爲君次四味爲臣君藥倍用臣藥減半佐視臣又減半共爲極細末於冬至日脩合取雪水煮升麻汁打麵糊爲丸辰砂爲衣竹葉煎湯下

嘉靖甲午春痘毒流行病死者什八九乃一厄也時有預服三豆子湯絲灰辰砂散者凡方書所載預解痘毒之法靡不用之未見效者予竊思痘疹疫癘之毒因歲運災疘之變難以藥解而人事未盡又不可諉之天數也於是檢閱古方乃於韓氏醫通得五瘟丹以五運爲主喜曰此解毒神藥也依方脩合施售與人但報之者莫不輕疎人皆神之因命之曰代天宣化丸

十三 勺氣散

木香 青皮各五錢 山查肉一錢半

右為細末每服一錢甘草湯調服

十四活血散即芎歸湯

當歸 川芎各等分

右細末每服一錢紅花湯調服

十五快斑湯治起發遲

人參五分 當歸 防風 木通各一錢

甘草三分 木香 紫草 蟬蛻各二分

右剉細水一盞煎七分去渣溫服不拘時

十六消毒飲解痘毒

牛蒡子 連翹 甘草 綠升麻

山豆根 紫葦各等分

右剉細水一盞煎七分去渣溫服不拘時

十七奪命丹

麻黃酒蜜炒焦 升麻各五錢 山豆根 紅花子 大力子

連翹各二錢半 蟬蛻 紫葦各錢半 人中黃三錢

右研細末酒蜜和丸辰砂為衣薄荷葉煎湯下

附方神應奪命丹

辰砂 擇牆壁鏡面者白紗囊盛之用升麻麻黃紫草連翹四味同砂囊放砂罐內入新汲水以

桑柴火煮一晝夜取出辰砂研細仍將煮砂藥汁重紙濾去渣飛取未待乾听用二錢 麻黃

不去根節酒蜜拌 蟬蛻 水洗淨去足翅三分 紫草 酒洗五分

紅花子 五分 真蟾酥 三分 穿山甲 酒炙拌炒五分

共研細末用醅酒杵丸分作十粒周歲者半丸

二歲者一丸服止三丸熱酒化服厚蓋取汗汗

出痘隨出也擇天醫生氣日脩合 此方與三酥餅同

十八調元湯痘科良方氣壯實者不宜 即保元湯

人參 一錢 黃耆 二錢 甘草 一錢

右剉細加生姜一片水一盞半煎至一盞去渣溫服不拘時

十九四物湯養血

當歸 川芎 芍藥 地黃

右剉細水一盞煎七分去渣溫服無時

二十四君子湯補氣

人參 白朮 茯苓 甘草

右剉細水一盞煎七分去渣溫服無時

二十一葛根解毒湯痘中止渴良方

葛根 天花粉 麥門冬 生地黃

升麻 各等分 甘草 減半

右剉細取糯米泔水一盞煎七分去渣入茅根自然汁一合服之

二十二 人參 麥門冬 散治痘中渴

麥門冬 葛粉 各二錢 人參 甘草 升麻

白朮 各五錢

右剉細加糯米一合淡竹葉七片水一盞煎米熟去渣溫服

二十三 人參 白朮 散治痘泄又渴 又名參苓白朮散

人參 白朮 藿香 木香 甘草 各一錢

乾葛 二錢 白茯苓 一錢

右剉細加生姜一片水一盞煎七分去渣溫服無時

二十四 人參 白虎湯 解斑疹良方 又名化斑湯

人參 一錢 知母 三錢 甘草 一錢 石膏 五錢 糯米 一合

右剉細水二盞煎待米熟去渣溫服無時

二十五 陳氏木香散 治虛寒證 純陰無陽者

木香 大腹皮 人參 肉桂 半夏

青皮炒 前胡 赤茯苓 甘草炙 訶子肉

丁香各等分

右剉細加姜三小片水一盞煎如虛加黃耆等分糯米一撮同煎

二十六陳氏異攻散治虛寒證純陰無陽者

木香 當歸 茯苓各二錢半 肉桂二錢 人參

肉豆蔻 陳皮 丁香 半夏各二錢半 厚朴

附子 白朮各一錢半

右剉細每服三錢加生姜三片棗一枚煎先服去附子亦可若裏虛瀉甚又不可無附子量兒歲數加減服之

二十七四順清涼飲治裏熱證大便結

當歸 白芍藥 大黃 甘草

右剉細水一盞煎七分去渣食前服

二十八五苓散治表裏有熱小便不利

澤瀉一錢半 白朮 赤茯苓 猪苓各一錢 肉桂五分

右剉細加生姜一片棗一枚水一盞煎七分去

渣温服

二十九桂枝大黃湯治腹痛大便不通良方

桂枝 白芍藥各二錢半 大黃一錢半 甘草五分

右剉細加生姜一片水一盞半煎至一盞去渣食前温服

三十承氣湯治實熱證純陽無陰者

大黃 厚朴 枳實各一錢 甘草五分

芒硝一錢

右剉細水一盞加生姜一片煎七分去渣食前

服

三十一黃耆健中湯治裏虛腹痛良方

黃耆 人參 桂枝 白芍藥 甘草各等分

右剉細加生姜三片棗二枚水一盞煎五分去渣温服

三十二化毒湯治痘未出腹痛者

肉桂五分 白芍藥 甘草各一錢 青皮 木香

枳殼各七分 山查肉 連翹各五分

右剉細水一盞煎七分去渣温服不拘時

三十三丁香脾積丸治痘中傷食良方

三稜去毛醋浸煨 莪木去皮如上製各五錢 丁香 木香各五錢

青皮去穢 烏梅肉燒存性 猪牙皂角燒存性各三錢

巴豆去殼取肉四十九粒

右為細末醋調神麩糊為丸如菉豆大每服五

七丸原物湯下

三十四理中湯丸治虛寒

人參 白朮 甘草 乾姜各等分

右剉細水二盞煎一盞去渣溫服若欲為丸研

細末煉蜜為丸如彈子大每用一丸白湯化下

三十五導赤散治心熱發搖

生地黃 木通 甘草炙各等分

右剉細加淡竹葉七片水一盞煎七分去渣溫

服一方加人參麥門冬

附方導赤通氣湯治心虛聲不揚者

生地黃 木通 麥門冬 人參 石菖蒲

甘草 當歸身

燈心作引水煎服

三十六牛黃清心丸治心熱神昏

牛黃二分 辰砂一分 黃連五錢 鬱金二錢 黃芩

山梔仁各三錢

共研細末臘雪調麵糊為丸如黍米大每服七八丸燈心湯送下

三十七十宣散治痘癰一名十奇散一名托裏十補散

黃耆 人參 當歸各二錢 厚朴 桔梗各錢

桂心三分 川芎 防風 甘草 白芷各半錢

右為細末每服一錢或二錢木香湯調下

附方真人解毒湯治痘母

木通 防風 荆芥 連翹各三錢

忍冬花半斤 甘草節一兩

分作三劑用水酒各半煎服以腫消痘出為度

三十八十全大補湯補養氣血痘科中之良方

黃耆 人參 當歸 白芍藥 白朮

生地黄 白茯苓各一錢 川芎 甘草各五分 官桂三分

右剉細加生姜三片棗二枚水一盞半煎一盞

去渣溫服不拘時候

三十九寧神湯

人參 當歸身 生地黄 麥門冬各一錢

山梔仁 黃連炒 甘草炙各五錢 辰砂末二分

石菖蒲三分

右剉細加燈心半錢水一盞煎七分去渣調辰

砂攪勻食後溫服

四十抱龍丸治痘驚 又名琥珀抱龍丸

真琥珀 天竺黃 白檀香 白茯苓

人參各一兩半 粉草去管三錢 枳殼炙炒一兩 枳實炙炒一兩

辰砂水飛五兩 金箔一百片 山藥去黑炒一斤 牛膽南星一兩

右各取細末再篩和勻每藥一兩取新汲水一

兩重入乳鉢內杵勻丸如彈子大陰乾勿用日

晒則燥裂矣每服一丸薄荷葉煎湯化下

四十一黃芩湯治協熱而利

黃芩一錢半 甘草炙一錢 白芍藥六錢

右剉細加大棗二枚水一盞煎七分食前溫服

四十二黃芩加半夏湯

即前黃芩內加半夏一錢生姜一錢

四十三肉豆蔻丸治協寒而利

肉豆蔻錢五木香

砂仁

白龍骨

訶梨勒肉各五錢

赤石脂

白枯礬各七錢半

右為末麵糊丸黍米大一歲服三五十九米飲下

四十四錢氏異攻散補脾胃

人參 白茯苓

白朮

甘草

炙陳皮

各等分

右為末每服二錢生姜五片棗二枚水一盞煎

七分去渣食前溫服

四十五益黃散補脾虛寒

陳皮

一兩

丁香

二錢

青皮

甘草

炙

訶子肉

各半兩

右為末每服二錢水一盞煎至六分去渣溫服

四十六八正散治大小便不通

滑石

瞿麥

大黃

木通

扁蓄

車前子

梔子仁

各一錢

甘草

五分

右剉細加燈心一錢水一盞煎七分去渣食前

服

四十七安神丸

當歸身

黃連

麥門冬

白茯苓

甘草 各半兩 朱砂 一兩 龍腦 二分

右為末湯浸蒸餅和獐猪心血搗勻丸如黍米大每服十九燈心湯下

四十八 萊連散治乾嘔

黃連 五錢 吳茱萸 二錢 青竹茹 一團

右二味同炒研細末每服半錢生姜湯調服

四十九 橘皮湯

橘皮 半兩 白半去 半夏 一錢 白茯苓 一錢

右剉細加生姜五分水一盞煎七分去渣溫服

五十 香連丸 一名香橘丸

木香 半兩 黃連 一兩 以吳茱萸五錢同炒去吳茱萸不用

石蓮子 取肉二錢半 陳皮 半兩

右為末醋調神麩糊為丸如麻子大每服二三十九丸陳倉米湯送下

五十一 膽導法此通大便秘結之良法也不損中氣

強如用藥 用大猪膽一枚以鷺翎筒兩頭截齊一

頭入膽中線牢札定吹令氣滿納入穀道中直待

氣通取去

又猪胞導法

用猪尿胞一箇以竹管插放胞口中吹起又取猪膽汁生蜜清油各半杯攪勻灌入胞中又吹起以線札定氣如上膽導法尤捷此因治余光庭新立法也

五十二百祥丸

一名南陽丸

紅牙大戟不拘多少漿水煮極軟去骨日中晒乾復內原汁中煮汁盡焙乾研為末水丸如粟米大每服一二十九研赤芝麻湯下

五十三牛李膏

名必勝膏

牛李子不拘多少取汁石器中熬成膏牛李子野生道邊至秋結實黑丸成穗每服皂子大一丸煎香膠湯化下○此上二方治痘瘡黑陷便秘裏實證

五十四瀉白散治肺熱而喘

又名瀉肺散

桑白皮 地骨皮 各一兩 甘草 炒半兩

右為末每服一二錢加粳米百粒水一盞煎六分食後溫服

五十五黃芩瀉肺湯治肺熱裏實證

黃芩 梔子 枳殼 甘草 炙 薄荷

連翹

杏仁

去皮尖

大黃

桔梗

炒

水煎食後服

五十六 前胡枳殼湯

前胡

枳殼

茯苓

大黃

甘草

各五錢

右剉細每服三錢水煎如身溫脈微瀉者不可

服

五十七 柴胡麥門冬散

柴胡

半錢

麥門冬

八分

龍膽草

三分

甘草

二分

人參

玄參

各半錢

右剉細水煎服

五十八 葛根麥門冬散治斑疹毒大熱而渴

乾葛

麥門冬

各一錢半

赤芍藥

石膏

升麻

甘草

茯苓

人參

各半錢

右剉細加淡竹葉七片水一盞煎七分去渣溫

服

五十九 生地黄散治斑疹肺熱喘咳

生地黄

一錢

麥門冬

五分

杏仁

欬冬花

陳皮

各八分

甘草

三分

右剉細水煎服一方加桔梗五分

六十射干鼠粘子湯治咽喉痛

射干一兩鼠粘子四兩甘草炒香升麻各一兩

右剉細散每服二錢水一盞煎服

六十二人參清膈散治肺熱鼻乾涕唾稠粘

人參 柴胡 白芍藥 當歸 知母

桑白皮 白朮 黃耆炙 地骨皮 紫苑

茯苓 甘草 桔梗各五分 黃芩二分 石膏七分

滑石七分

右剉細加姜如錢大三片水一盞七八分去渣食後溫服

六十二仙聖散治痘疹不起發因內實者

紫草 木通 甘草 黃耆炙 枳殼各等分

右剉細加糯米一百粒水一盞煎待米熟去渣溫服

六十三紫草飲治痘瘡黑陷不起

紫草 芍藥 麻黃 當歸 甘草各等分

右剉細水一盞煎不拘時服

六十四 加味四聖散治痘瘡黑陷倒陷

紫草 木通 木香 黃耆炙 川芎

甘草 人參各等分 蟬退十箇

右剉細加糯米百粒水一盞煎服

六十五 玄參地黃湯治痘疹衄血

玄參 生地黄 牡丹皮 梔子仁各一錢半

甘草 升麻各半錢 白芍藥一錢

右剉細加炒蒲黃半錢水一盞煎七分去渣溫服

服

六十六 神應膏護目方

黃蘗一兩 甘草四兩 紅花二兩 真菜豆粉一兩半

右為細末用臘脂水和蜜水調塗兩眼四畔之

痘瘡上

六十七 麻黃湯

麻黃 杏仁 甘草各等分 石膏倍用

右剉細加臘茶葉一錢水一盞煎七分去渣不

拘時服一方無名膏有桑白皮

附方清金散火湯此上二方治痘疹初發熱而喘

麻黃炒 蘇葉 桔梗 甘草 牛旁子炒

水煎服如腹脹加厚朴大腹皮大小便秘加葶

藶炒梔子仁炒

六十八 當歸六黃湯治自汗盜汗

當歸 生地黄 熟地黄 黃耆炙各一錢

黃芩 黃連 黃蘗各半錢

右剉細水一盞煎服

六十九 溫粉撲法治汗出太多不止

黃連 貝母 牡礪粉各半兩 粳米粉一升

右為細末傅於身上

七十 敗蒲散止汗一名止汗散

用故蒲扇燒灰每服三錢溫酒調下無時服

七十一 荆防敗毒散疹子痘子之發散藥也

荆芥穗 防風 柴胡 甘草 人參 桔梗

川芎 茯苓 枳殼 前胡 羌活 獨活

右剉細加薄荷五葉水一盞煎七分去渣溫服

七十二 四聖散痘不起發變黑而痛者痘疔也一名鬼痘

菘豆四十九粒 豌豆四十九粒 珍珠一分 油頭髮一分
各燒存性 燒存性

右為細末臙脂水調先以銀簪子撥開黑瘡以此塗之

附方治痘疔

雄黃 一錢 紫草 三錢

共為細末臙脂汁調銀簪挑破黑疔入藥在內此上二方皆治痘疔

七十二 無價散治黑陷解疫毒之良方

用人貓猪犬糞臘月內燒為灰沙糖水調服

七十四 胡荽酒治倒陷

胡荽四兩切以好酒二盞煎一兩沸入胡荽用物蓋定再煎勿令洩氣放冷每吸一兩口微噴從背至足遍勿噴頭面病人常令聞荽氣

七十五 水楊湯治倒陷之良方

水楊即忍冬藤也春冬用枝秋夏用枝葉剉斷用長流水一大釜煎六七沸先將三分中一分置浴盆內以手試不甚熱亦不可太溫先服宜用湯藥然後浴洗漸漸添湯以痘起發光壯為度不拘次數

七十六 臘脂塗法治黑痘之良方

先以升麻一味煎濃湯去渣却用臘脂於湯內揉出紅汁就以本綿蘸湯於瘡上拭之

附方獨聖散治痘瘡倒陷

牛旁子 炒五錢 白僵蚕 一錢半

右味入紫草三莖同煎連進二錢

七十七 苦參丸治痘後潰爛成疥

苦參 一兩 白蒺藜 何首烏 牛旁子 各半兩

荆芥穗 半兩

共為末酒調麵為丸竹葉湯下

七十八 滅癩救苦散治爛痘以此傅面如誤抓破者

用之傅貼最良

蜜陀僧 滑石 各二兩 白芷 半兩

右為細末濕則乾摻之乾則好白蜜調傅

七十九 白龍散治爛痘及抓破者

用乾黃牛糞在風露中多久者火煨成灰取中心白者為末薄絹囊裹於瘡上撲之

八十 敗草散治爛痘不成痂者用此鋪攤被席

多年屋上爛茅草擇淨者為末摻之墻上爛草亦佳以多受風露之氣故能解痘瘡毒

八十一茵陳薰法治痘瘡瘙痒

用乾茵陳研末搗棗膏和丸如雞子大晒乾裂火燒烟薰之

八十二消風化毒湯

防風 黃耆 白芍藥 荆芥穗

桂枝 牛旁子 升麻各等分 甘草減半

右剉細加薄荷葉七片水一盞煎七分去渣溫

服無時

八十三羌活救苦湯

羌活 白芷 川芎 蔓荊子 防風

桔梗 黃芩 連翹 升麻 大力子

人中黃各等分

右剉細加薄荷葉七片水一盞煎七分去渣食後溫服

八十四消毒化斑湯

升麻 柴胡 龍膽草 桔梗 甘草 牛旁子

連翹 防風 蜜蒙花 蟬蛻

右剉細加淡竹葉十片水一盞半煎一盞去渣食後服

八十五柴葛桂枝湯

柴胡 葛根 桂枝 甘草 防風

人參 白芍藥 各等分

右剉細加生姜三片水一盞煎七分去渣溫服不拘時

附醫鑑三方

內托散治氣血虛損或風穢冲觸使瘡毒內陷伏而不出或出而不勻快此活血勻氣調胃補虛內托瘡毒使之盡出易收易屬

黃芪 人參 當歸 各二錢 川芎 桔梗

厚朴 姜汁炒 白芷 甘草 生各一錢 木香 肉桂 各三分

右於紅紫黑陷屬熱毒者去桂加紫草紅花黃芩若淡白灰黑陷伏屬虛寒者加丁香救裏桂救表當貫膿而不貫者倍參芪當歸煎熟入人乳好酒溫服泄瀉加丁香乾薑肉蔻

秘傳復生散治痘瘡黑陷不起發

珍珠 琥珀 雄黃 硃砂 川山甲

兩頭尖 香附米 各一錢 真蟾酥 五分

右先將蟾酥切片以人乳汁浸少時入衆藥搓勻一歲兒服八釐二三歲兒服一分二釐用熟

蜜水調下

硝膽膏

硝膽膏醫口不收 瘡癩臭爛血膿流

宜研猪膽芒硝細 患處塗之病自瘳

猪膽汁芒硝二味研勻如膏塗之

痘疹世醫心法卷之十一終

痘疹世醫心法卷之十二

八十六五積散冬月痘出不快用此發之

白芷

川芎

桔梗

芍藥

茯苓

甘草

當歸

桂枝

半夏

陳皮

枳殼

麻黃

蒼朮

厚朴

右除桂枳殼二味別為粗末外一十一味剉細

慢火炒令轉色攤冷次入二味末令勻水一盞

半生姜二片煎至一盞去渣溫服無時

八十七辰砂散預解痘毒

好辰砂錢一絲瓜近蒂三寸連子燒灰存性此物發痘瘡最好

右研末蜜水調服云多者可少少者可無或以紫草甘草湯調服尤佳

八十八連翹湯此解裏熱之良方痘疹通用

連翹 防風 瞿麥 荆芥穗 木通 車前子

當歸 柴胡 蟬蛻 赤芍藥 黃芩 白滑石

甘草 山梔子各五分 博愛心鑑有牛旁子名大連翹飲

右剉細加紫草五分水一盞半煎一盞去渣食前溫服

八十九黃連解毒湯此解火毒痘疹通用

黃連 黃芩 黃蘗 梔子各等分

右剉細水一盞半煎至一盞去渣熱服

九十桂枝芍藥湯

桂枝 白芍藥 防風 黃耆炙 甘草各等分

右剉細加棗子二枚水一盞煎七分去渣溫服

九十二木香大安丸治傷食

木香錢二 黃連 陳皮 白朮各三錢

山查肉 枳實 萊菔子炒 連翹

神麩炒 麥蘖炒 砂仁各一錢半

右為末神麩糊為丸陳廩米湯下

附方補中順氣湯

人參 當歸 木香 青皮 厚朴

甘草炙 山查肉

右剉細水煎服

九十二宣風散治黑陷裏實以代百祥丸牛李膏

檳榔二兩 陳皮 甘草各半兩 牽牛四兩用半生半炒取頭末一兩

右為末三三歲蜜湯調下半錢已上一錢食前

服

九十三辟穢香痘家常宜焚之

蒼朮一斤 大黃半斤

右剉細研放火爐中燒之不可間斷

九十四天水散治痘乾燥而痛

白滑石四兩 甘草一兩

共為細末白湯調服或用塗痘子甚佳以蜜水

調刷之

九十五洗肝明目散治痘後目疾

當歸 川芎 羌活 防風 山梔仁

龍膽草 柴胡 木賊 蜜蒙花各等分

右剉細為末每服一錢淡沙糖水調服

九十六 蟬蛻散治痘後目疾良方

蟬蛻 蜜蒙花 黑豆殼菜豆殼各等分 夜明沙分

共為細末每用一錢以猪羊肝一片批開入藥

末在內麻札定米泔煮熟頻與食肝飲湯

九十七 拔毒膏治痘癰一名必勝膏

馬齒莧汁 石蜜 猪膏脂 生葉豆末 赤小豆末

右以三味共熬膏塗腫處如乾以水潤之

九十八 百花膏治痘燥痂皮濺起作痛

石蜜不拘多少畧用湯和時時以鷲翎刷之瘡痂亦易落無痕

九十九 柴胡飲子治痘瘡表裏俱實良方

柴胡 防風 當歸 白芍 黃芩炒

人參 甘草 大黃各等分 滑石倍用

生姜一片水煎服

一百 當歸丸治大便堅三五日不通者

當歸半錢 黃連半錢 大黃二錢 甘草炙一錢 紫草三錢

先以當歸紫草熬成膏以下三味研為細末以膏和為丸如糊椒大三歲以下兒十九七八歲兒二十九食前清米飲下漸加以利為度

一百一 解毒防風湯

防風錢一 地骨皮 生黃耆 白芍藥

荆芥穗 鼠粘子 各半錢

右剉細水煎服或加升麻半錢

一百二 九味順氣散 又名勾氣散

白朮 白茯苓 青皮 白芷

陳皮 烏藥 人參 各半錢 甘草 二分半

木香 一分半

右剉細水一盞煎七分去渣溫服

一百三 馮氏天花散治痘失聲

天花粉 桔梗 白茯苓 訶子肉

石菖蒲 甘草 各等分

右為細末用水調半匙在碗內外以小水竹七

莖黃荆七條縛作一束點火在碗內煎臨臥服

一百四如聖湯

芍藥 升麻 乾葛各一錢 甘草 紫草

木通各五分

右剉細加生姜一片水一盞煎七分去渣溫服不拘時

解毒快斑湯

羌活 防風 升麻 葛根 柴胡 川芎 白芷 麻黃炒 紫草 桔梗 甘草
右剉細生姜葱白作引水煎服取汗解去熱毒

則痘自易出易靨也

龍腦安神丸治痘中昏悶譫妄良方

大辰砂一錢 龍腦五厘 牛黃五厘

共研為細末取獐猪心中血小猪尾尖血和丸如菘豆大每服用一丸新汲水化下燈心煎湯亦可

附方退火回生丹治痘中狂妄神方

滑石一錢 辰砂一錢 冰片三厘

共為細末冷水調一分服得睡少時神安氣寧

痘轉紅活矣

一百五 蟬蛻膏

蟬蛻去毒

當歸

防風

甘草

川芎

荆芥穗

升麻

各等分

加白芍藥

人參

化下

一百六 養脾丸

人參

白朮

當歸

川芎

各一錢半

木香

青皮

黃連

陳皮

各一錢

砂仁

山查肉

神麩炒

麥芽

炒各半錢

右為細末水調神麩糊為丸如麻子大每服三五十九丸陳倉米飲送下

一百七 東垣鼠粘子湯

鼠粘子

炒香

當歸身

甘草

炙各一錢

柴胡

連翹

黃耆

黃芩

各一錢半

地骨皮

右剉細水一大盞煎至六分去渣溫服腹空服藥畢日休與乳食

一百八 解毒湯解胎毒之良方

又名遡源解毒湯

當歸身 川芎 生地黄 白芍藥 人參

連翹 黃連 甘草生 陳皮 木通各等分

右剉細加淡竹葉十片水一盞煎半盞去渣溫服無時

一百九 瀉黃散治脾熱 一名瀉脾散

藿香葉七錢 山梔仁一兩 石膏半兩 防風二兩 甘草七錢半

右剉細用蜜酒微炒香為末每服二錢至三錢水一盞煎七分溫服

一百十 瀉青丸治肝熱作搐良方 一名瀉肝丸

羌活 大黃煨 川芎 當歸

防風 山梔仁 龍膽草各等分

右為末煉蜜和丸雞頭子大每服半丸至一丸竹葉湯同沙糖水化下

一百十一 粉紅丸 一名溫驚丸

牛膽南星四兩 朱砂一錢半 天竺黃半兩 龍腦半錢

坏子臘脂 一錢

右為末用牛膽汁和丸雞頭子大每服一丸小者半丸沙糖溫水化下

一百十二實表解毒湯

黃芪 人參 當歸稍 生地黄 柴胡
白芍藥 玄參 升麻 地骨皮 酒片苓
甘草

右剉細加薄荷葉少許淡竹葉十片水煎溫服

無時

一百十三托裏快斑湯

當歸 黃耆 川芎 木香 青皮 紫草
連翹 木通 防風 桂枝 蟬蛻 牛旁子

右剉細加淡竹葉十片水煎溫服無時

一百十四惺惺散解發痘疹良方

人參 桔梗 甘草 白茯苓
瓜蒌根 白朮 各等分 細辛 少許

右為末每服二錢水一盞入薄荷葉五片煎七分溫服不拘時候 一方有防風川芎

一百十五通關散此藥通心經利小便良方

山梔仁 大黃 炒各一分 車前子 炒 木通 甘草 炙
赤茯苓 瞿麥 人參 滑石 各三分 扁蓄 炒五分

右剉細用水一盞燈心十根煎半盞溫服

一百十六 蟬殼明目散治痘後目病

蟬殼去翅足 地骨皮 黃連 牡丹皮 白朮

蒼朮米泔浸切焙 菊花各一兩 龍膽草五錢 甜瓜子半斤

右為細末每服一錢牛荊芥煎湯調下食後臨臥各一服治時疾後餘毒上攻眼目甚效忌熱

麩炒豆醋醬等物

一百十七 紫草飲子治倒陷腹脹大小便秘

紫草茸 人參 山查肉 蟬蛻 枳殼

穿山甲土拌炒各等分 木通

右剉細用水一盞煎五分作三四次溫服

一百十八 經驗方治痘眼

白菊花 菘豆皮 穀精草去根各半兩

右為細末每服抄一大錢乾柿一箇生粟米泔一盞熬米泔盡將柿去核食之一日可食三枚無時病淺者二十日遠者一月必効

一百十九 快斑越脾湯治痘瘡手足不起發者

黃耆炙 桂枝 防風 甘草炙 白芍藥

右剉細加生姜一片棗一枚水煎服不拘時

一百二十土桃仁承氣湯

桃仁二十箇去皮尖研泥勿煎 大黃二錢 官桂 紅花各一錢

甘草五分

右四味研細水一盞煎七分去渣入桃仁泥化

開食前服

一百二十一酸棗仁湯

酸棗仁去殼取仁 甘草炙 生地黃 梔子仁

麥門冬 人參 當歸身各等分

右剉細加燈心水一盞煎七分去渣溫服不拘時

一百二十二排毒散治痘毒發癰

大黃一兩 白芷 沉香 木香各半兩

穿山甲七片土炒焦捲 當歸稍一兩

共為細末看虛實大小加減長流水煎沸調服

附方解毒內托散治痘癰

黃耆 當歸 防風 荆芥 連翹

木通 金銀花 赤芍藥 甘草節

水煎入酒少許服

一百二十三 蕎麥粉治痘瘡潰爛以此傅之

蕎麥一味磨取細麵痘瘡破者以此敷之潰爛者

以此遍撲之絹袋盛撲以此襯臥尤佳

一百二十四 升陽解毒湯

升麻 當歸 柴胡 桔梗 甘草 牛旁子

蟬蛻 連翹 防風 蜜蒙花 荆芥穗各等分

右剉細水一盞煎七分去渣食後溫服

一百二十五 綿繭散治痘後疳蝕瘡

出蛾綿繭不拘多少 白礬搥碎入鹽內以炭火燒令礬汁盡

共研極細末每用乾貼疳瘡口內

一百二十六 棗變百祥丸此可代百祥丸牛李膏用

之青州棗三十箇 去皮核 紅牙大戟去骨一兩

右用水一盞同煎至水盡為度去大戟不用將

棗搗爛為丸從少至多木香湯吞以利為度

一百二十七 四白滅癥散治痘後面瘡以此傅之

白芷 白附子 白僵蚕 鷹矢白 蜜陀僧各

等分

共研極細末以水調搽面點神效

一百二十八 流氣飲治痘癰

川芎 人參 防風 木香 黃耆 當歸稍

桂心 桔梗 白芷 厚朴 枳實 白芍藥

烏藥 紫蘇葉 甘草節 雞心檳榔各四分

右剉細水一盞煎七分服氣血虛而自利者加

熟附子大便實加大黃

一百二十九 小柴胡加生地黃湯治痘癰

柴胡 人參 黃芩各三錢 甘草炙二兩 生地黃

半夏各二兩湯泡七次

右為粗末每服三錢水一盞生姜三片棗一枚

煎至半盞去渣溫服

一百三十 篔衣湯治癰疹疙瘡作痒

炊飲篔衣煮水洗癰起疙瘡者神效如無以炊篔

煮湯亦好

一百三十一 蟬針法治痘癰及丹瘤

取水蛭大者五六條放腫處吮去惡血可以消丹

瘤決癰腫

附方砭法治丹毒

用細磁器擊碎取有鋒鋸者以筋一根劈開頭夾
之用線縛定兩指輕捉筋稍令磁鋒正對患處懸
寸許再用筋一根頓擊筋頭令毒血遇擊刺之皆出
一百三十二消風散

人參 羌活 川芎 甘草炙 防風

荆芥穗 白茯苓 蟬蛻去足 白僵蚕炒 陳皮去白

藿香葉 厚朴各半兩

右為末每服二錢茶清調下

一百三十三小柴胡加枳桔湯

柴胡一錢 枳殼 桔梗各一錢 人參

黃芩各二錢 半夏 甘草各半錢

右為粗末每服三錢水一盞生姜一片煎六分

溫服

一百三十四五皮湯治痘後面腫

桑白皮 地骨皮 生姜皮 大腹皮

五加皮各等分

右剉細取長流水一盞燈心十二莖煎七分溫

服

一百三十五 塌氣丸治腹脹

木香

半兩

雞心檳榔

一雙 白者

黑牽牛

二兩半生半炒 取頭末一兩

共為末神麩糊為丸如黍米大姜湯下

一百三十六 胃苓湯治痘後遍身浮腫

豬苓

澤瀉

白茯苓

白朮

蒼朮

厚朴

紫油者 姜汁炒

陳皮

桂心

甘草

右剉細水一盞煎七分去渣溫服無時

一百三十七 洗心散治口舌生瘡之良方

當歸

木通

生地黄

黃連

麻黃

大黃

薄荷葉

各等分

右剉細水一盞加燈心為引煎七分去渣溫服

一百三十八 馬鳴散治走馬疳良方

人中白

即溺缸底白堊也以物刮取用新 瓦盛之火煨過如白鹽乃佳半兩

五倍子

生一錢另用 一錢同礬枯

馬鳴退

即蚕退紙也火 燒過二錢半

白礬

二錢搥 碎另取

五倍子一錢入礬 於內用火煨枯

共為極細末先以米泔濃汁浸洗以此傳之

一百三十九 化匿丸

黃連

牛兩

蜀椒

去閉目者炒出汗二錢

苦練根白皮

乾二錢

右共研末用烏梅肥者七箇艾湯浸去核搗爛

和丸艾湯下

一百四十養血化斑湯治白疹

當歸身

生地黃

人參

紅花

蟬蛻

各等分

右剉細水一盞生姜一片煎六分去渣溫服無

時

一百四十一大青湯解斑疹大毒良方

大青

玄參

石膏

知母

木通

甘草

生地黃

地骨皮

荆芥穗

各等分

右剉細水一盞淡竹葉十二片煎七分去渣溫

服無時

一百四十二柴胡橘皮湯

柴胡

橘皮

白茯苓

黃芩

人參

半夏

各等分

右剉細加竹茹一團生姜三片水一盞煎七分

去渣溫服不拘時候

一百四十三柴胡四物湯治疹後餘熱

柴胡

人參

黃芩

川芎

知母

當歸身

生地黃

白芍藥

地骨皮

麥門冬

淡竹葉

右剉細水一盞煎七分去渣溫服不拘時

一百四十四門冬清肺湯治疹後咳嗽不止

天門冬

去心

麥門冬

去心

款冬花

牛蒡子

知母

貝母

桔梗

杏仁

去皮尖研

甘草

馬兜苓

地骨皮

各等分

右剉細水一盞煎七分去渣食後溫服

一百四十五當歸養心湯

當歸身

麥門冬

升麻

人參

甘草

生地黃

酒洗

右剉細加燈心十二莖水一盞煎七分去渣食

後服

一百四十六安胎飲娠婦痘疹常宜用之

條實黃芩

沉水者二錢

人參

一錢

白朮

一錢

當歸身

一錢

白芍藥

一錢

川芎

陳皮

大腹皮

黑豆汁浸酒洗淨各八分

甘草

連殼砂仁

炒研五分

紫蘇葉

八分

右剉細水一盞半糯米一撮煎一盞去渣温服
不拘時

一百四十七河間涼膈散解痘疹表裏俱熱純陽無
陰之證

大黃

朴硝

甘草

各半錢

連翹

一錢

梔子

黃芩

薄荷

各二分半

淡竹葉

五片

右剉細作一服水一盞煎八分去渣入蜜一匙
和勻服

附方東垣涼膈散解痘疹裏熱良方

即前方去大黃

朴硝加桔梗

此上諸方藥品脩製法並見格致要論中

痘疹心法卷之十二終

太醫院吏目樊應乾校閱



源珍心法

卷

大醫家集卷之八



源珍心法

